

Pablo Corinto Anoafo Kirika Kenexō Fomani

Pablo Jesús chanĩmara faafo Corinto anoafo kirika kenexō ato fomani

¹ Ēkĩa Pablo, ẽ mato kirika kenexō fomai. Nofe yora feta nã Jesús Ifofamis feta, ãfe ane Sóstenes, efeta mato kirika kenexoni. Epa Niospa ea katopaikĩ ea katonĩ ãfe meka shara Jesucristoõnoa ẽ yoifofãsafanõ. ² Akka Jesucristo ea nĩchĩni ẽ ãfe meka shara keyokõĩ maifo tii ẽ ato yoifofãsafanõ. Corinto anoafãfe mãfi Niospa fakefoki. Nãskakẽ ẽ mato kirika kenexō fomai. Mã mēxotaima ichanãmis Niospa meka shara tãpisharakõixikĩ. Niospa mato katonĩ Jesucristoõnoax mã afe yora shara inõ. Mato fisti katonĩma, a shinãifori keyokõĩ ato katonĩ mato fe Niospa yora inõfo. Nã mai fetsa anoafãfe nõko Ifo ãto Ifori. ³ Mato noikĩ mãto shinã mēraxõ mato shinãmasharanõ. Epa Nios feta nõko Ifo Jesucristo mato askafanõ.

Jesucristo afara sharafo noko axotiro

⁴ Mē tãpia Jesucristo mato noikĩ afarafo mato tãpimani ãfe õiti keskara mã inõ. Nãskara tãpixõ ẽ Epa Nios kĩfikĩ iskafa fafafãini: “Aicho Epa Niosi, mĩ Corinto anoafo afara sharafo Jesucristoõxõ mĩ ato tãpimanaki,” ixõ ẽ kĩfifafãini. ⁵ Chanĩma, Jesucristo mato fe rafesharaino aõxõ mã Niosnoa tãpisharakõitiro. Akka ãfe shinãõxõ xafakĩa mã yorafo mã yoisharatiro. Jesucristoõnoa mã ato yoisharatiro. ⁶ Nõ mato Jesúsnoa yoini keskara

nikakĩ mǎto õiti fetsafaxõ a keskara shara mǎ ixii. Nǎskakẽ mǎ Jesús chanĩmara faxõ mǎ mǎ ato õimana. ⁷ Nǎskakẽ Epa Niospa ãfe Yõshi Sharaõxõ mato imapaiyai keskara mǎ iki. Nios chanĩmara faa fetsafo nǎskarifiakani Niospa mato shinǎmasharaino. Nǎskakẽ mǎ nõko Ifo Jesucristo fe ipaikõikĩ mǎ manasharai nǎ nokoaitĩa õixikĩ. ⁸ Oyoxoma mato kexesharayoi. ãfe kerex shara mato inǎyoi mǎ Ifofasharano. Nǎskakẽ nokoõxõ yoixii iskafakĩ: “Mǎfi efe ipanakaki, ã mato chaka soaxonano. Nǎskakẽ tsõa mato iskafatiroma: ‘Mǎ chakakõifoki,’ mato tsõa fatirofoma,” ixõ mato Jesús yoixii. ⁹ Epa Niospa mato katonĩ ãfe Fake nõko Ifo Jesucristo fe mǎ rafenõ. Epa Nios chanĩma, noko yoiaĩ keskara aki.

Corinto anoxõ Jesús chanĩmara faafãfe anoris shinǎnifoma

¹⁰ Efe yora mĩshtichi, ã mato yoisharapai. Nõko Ifo Jesucristo ea yoiaino ã mato yoi nǎnorifos mǎ shinǎnõ, mǎ fetsa shinǎnõma. Jesucristo mato shinǎmapaiyai keskara fisti shinǎkãfe. ¹¹ Efe yora mĩshtichi, mẽ nika a Jesucristo mato shinǎmapaiyai keskara fisti mǎ shinǎima. Cloépa afe yorafo nono fẽkaxõ ea yoiafo mǎ feratenǎ faatanǎito. ¹² Akka mǎ atiri iskai fetsei: “Nõfi Pablo ifofamiski. Noko tǎpimanai keskara kayakakõi nõ nikamis. Fetsafãfekai kayakai shinǎkanima,” ixõ mǎ yoimis. Askatari fetsafori iskakani: “Nõfi Apolos ifofamiski,” ixõ mǎ yoimis. Askatari fetsafori mǎ iskamis: “Nõfi Pedro ifofamiski,” ixõ mǎ yoimis. Askatari fetsafori mǎ iskamis: “Nõfi Cristo Ifofai,” ixõ mǎ yoiketsamis.

13 Efe yora mĩshtichi, ¿afeskai mã feratenãimẽ? Askarakai sharama. Cristokai anori noko shinãmanima feratenãyanã anorima nõ shinãketsanõ. Cristokai ãfe shinã ranãyama. Mẽstekõĩ fisti noko yoimis. Akka, ¿afeskakĩ “Nõ Pablo ifofaira” mã ato faimẽ? Ëkai mato ifi cruz ikakĩnoax nãxonima. Cristo fistichi mato ifi cruz ikakĩnoax nãxoni mã Ifofanõ. Askatari êkai tsoa faka mẽra ikimakĩ maotisafama ea ifofanõfo. 14 Nãskakẽ ã inimai. Ëkai tsoa maotisafama. Akka Crispo yafi Gayo nã rafes ã maotisafa Cristo Ifofaifãfe õikĩ. 15 Nãskakẽ tsõa yoitiroma iskafakĩ: “Pablo ãfe aneõnoax ã maotisameni. Nãskakẽ ã Pablo ifofai,” ixõ tsõa shinãtiroma. 16 Chõõ, iskaratĩari ã rama shinãi. Estéfanas yafi afe yorafori ã ato maotisafani. Ë shinãyoama ã tsoa fetsa maotisafamara ã ika. 17 Cristokai ea yoia ã yorafo maotisafapanõ. Akka ea yoia ã aõnoa meka shara ã mato yoinõ. Ëa shinãxõ ã mato yoima. Ëa shinãxokai ã mato Jesucristo chanĩmara famatiroma. Jesucristo mato ifi cruz ikakĩnoax nãxoni mato chaka soaxoxikĩ. Cristo mekaõxõ Niospa mato chanĩmara famatiro.

Epa Niospa keyokõĩ tãpikõia afara fetsa apaikĩ atiro. Cristoõxõ noko õimayopaoni

18 Nãskakẽ Jesús ato nãxoni nikakanax a chanĩmara faafãfema yoikĩ iskafakani: “Jesús ifi cruz ikakĩnoax noko nãxoni nõko chaka noko soaxoxikĩ, ixõ noko yoipaiyaifãfe nõkai chanĩmara fatiroma. ãa chanĩkani,” ixõ shinãmisfo. Nãskakanax nãfo fenokõikani. Omiskõipakenakafo mẽra fokani. Akka nõ Jesús chanĩmara feito noko nimapakenaka nõ afe ãpaxanõ. Niospa ãfe

shinãõxõ Jesús noko nãxonì nõko chaka noko soaxoxiki. Afara fëtsakai noko nimatiroma nõ afe nïpaxanõ. ¹⁹ Akka Niospa meka kirikaki kenekĩ iskafanifo:

Fëtsa yoikĩ iskafatiro: “Nõ tãpikõia. Nõko mãpo shinãsharafãì nõ afara fetsafo fatiro nõfi tãpisharakõiakĩ,” ixõ shinãfikakĩ afaa tãpiafoma. Askarafofi ã ato õimanikai afãfe shinãifo keskarakai ã ato shinãmanima. Nãfãfekai afaa tãpimisfoma. ãa shinãmisfo,
ixõ Niospa yoini.

²⁰ Akka, ¿fanĩmẽ a nõ kirika kenekĩ tãpiakõiara imisfo? Akka tãpifikaxõ a Niospa shinãì keskara shinãkanima. Nãfofi Niospa ato õimaxii afaa tãpiafoma keskara fakĩ. “Nõfi afama mĩshti tãpikõiaki,” ifiaifãfe Niospa afaa tãpiama keskarafõ ato imai. ²¹ Tsõa pishtakai ãto shinãmã Nios tãpitirofoma. Nios fistichi keyokõì tãpisharakõia. Nãskakẽ nõ ato yoimis iskafakĩ: “Niospa tãpikõixõ ãfe Fake Jesucristo nĩchini noko nãxonõ nõko chaka noko soaxoxikĩ,” ixõ nõ ato yoimis. A Nios chanĩmara faafãfema yoikĩ iskafamisfo: “Jesús chanĩmara faifãfe aõnoa anorima yoimisfo,” ato famisfo. Akka nã Jesús chanĩmara faifo Niospa ato chaka soaxoni afe nipaxanõfo. Nã nõ mato yoimis.

²² Akka ãfe kaifo judeofo iskamisfo: “Niospa nai mẽraxõ afama mĩshti noko õimanaito chipo nõ Jesús chanĩmara fatiro,” ixõ shinãmisfo. Akka nã judeofomafãferi afama mĩshti tãpipaikani. Afeskaxõ Niospa yorafo imasharaimãkai tãpipaikani. Askatari afeskaxõ Jesús yorafo ãto chaka soaxonamãkĩ nãri tãpipaikani. Afama mĩshti

ãa shinãkakĩ tâpipaikani. Akka tâpitirofoma. Nãskakẽ iskamisfo: “Noko Jesucristoõnoa yoiaifono nõ tâpitiroma, fekaxkõi. Nãskakẽ nõ Jesús chanĩmara faima. Nã afara nõa nõ shinãi nõ chanĩmara fai,” ixõ yoimisfo. ²³ Nãnori shinãfiaifono nõ yoikĩ iskafamis: “Jesucristo ifi cruz ikakinoax noko nãxoni noko chaka soaxoxikĩ,” ixõ nõ yoimis. Akka ãfe kaifãfe judeofãfe yoikĩ iskafamisfo: “Ifi cruz ikakĩ mastafu askarakai nõko Ifo itiroma. Akka Cristokai afeskax natiroma,” ixõ judeofãfe shinãmisfo. Nãskatari yora fetsafu Cristoõnoa nikakani akiki kaxepaikani iskamisfo: “Tsõakai askara chanĩmara faima. Akka tsoa fẽtsakai noko nãxotiroma,” ixõ yoimisfo. ²⁴ Askafiaifono nõ chanĩmara faifo tii Niospa ato katoni afe ipaxanõfo. Judeofu yafi judeofomari Cristoõxõ Epa Niospa ato katoni chanĩmara faifãfe. Nãskakẽ ãfe shinã sharaõxõ ato nima. Atofi keyokõi tâpikõiaiki Cristoõxõ noko nima nõ afe nipaxanõ. ²⁵ Jesús chanĩmara faafãfema yoikĩ iskafamisfo: “Jesucristo noko nãxoni,” ixõ yoifikakĩ anorima shinãmisfo, ãa chanĩkakĩ. “Akka yora mapo sharayato Cristo chanĩmara fatiro,” ixõ yoimisfo a Jesús chanĩmara faafãfema. Akka anorima yoifiafona Niospa ãfe Fake Jesús noko nõchixoni noko nãxoyonõ. Nãskax Niospa ãfe shinã a chanĩmara faafãfema ãto shinã keskarama. Atofi mẽstekõi shinãmis. Akka nõ chanĩmara faafãfema yoimisfo iskafakakĩ: “Nõ tâpikõia,” ixõ yoifikakĩ yoisharamisfoma. Anorima shinãmisfo. “Nõ afama mĩshti fatiro,” ifiakakĩ fetsafu nimasharatirofoma. Askafikata aforikai ãa chaka soametirofoma. Akka Epa Nios fistichi afama mĩshti fatiroxakĩ noko chaka soaxotiro.

²⁶ Efe yora mīshtichi, Niospa rama mato katoano afe keskara mā iyopaonimāki. Shinākapo. Mā fisti rasichi mā kirika kene tāpia mā ipaoni. Askatari mā xanīfo ipaonima. Nāskax mā finakōia mā ipaonima. Akka nā Jesús chanīmara faafāfema yoikī iskafamisfo: “Afāfekai afaa tāpiafoma,” ixō mato yoimisfo. ²⁷ Mato askafafiaifono Epa Niospa mato katonī afe yora mā inō. Matoōnoa yoimisfo iskafakakī a Jesús Ifofaifāfema: “Afāfekai afaa tāpiafoma. Shināsharakanima,” ixō yoimisfo. Askatari shināmisfo iskakakī: “Nōfi afama mīshti fatiroki. Akka a Jesús chanīmara faifo pachikōifo, kerexkai shinātirofoma. Nō atiro keskara atirofoma,” ixō shināmisfo. Mato askafafiakakī chipo mato tāpitirofo. Niospa mato afara shara tāpimanaino ōikani rāfipaitirofo. ²⁸ Nāskakē shinākani iskakakī: “Jesús chanīmara faifo afāfekai afaa tāpiafoma. Nāskakē nō ato ōipaima,” ixō matoōnoa mato yoifiaifono Niospa mato katonī afe yora mā inō. “Māakai afaama,” mato fafiaifono Niospa mato katonī mā ato ōimanō akka afāfekairoko afaa tāpiafoma. ²⁹ Akka tsōa pishtakai Niospa ferotaifi yoitiroma iskafakī: “Ē tsoa keskarama. Ē shara shināi fetsafo keskarama,” ixō yoitiroma. ³⁰ Niosnoax Jesucristo afe yorafo mā inō. Jesucristoōxō noko mēstekōi tāpimani āfe ōiti keskara noko imaxii. Noko nāxonī noko chaka soaxoxiki nō afe nīpaxanō. ³¹ Nāskakē nō Jesús chanīmara faaxkai nō kakapaimis itiroma. Niospa meka yoikī yōra kirika kenenī iskafakī: “Akka tsoakai āa yoimesharatiroma iskaī: ‘Ē afama mīshti tāpikōia,’ ikax āa kakapaitiroma. Askatamaroko nō yoisharatiro nā afara sharafo

nõko Ifãfe aka,” ixõ kirika ano yõra keneni.

2

Jesucristo ifi cruz ikakĩ mastanifo Pablo ato yoini Corinto anoafo

¹ Efe yora mĩshtichi, ã matoki nokofenaxõ yõra shinãõxõ ã mato Niospa meka yoiyameama. Niospa ãfe shinã fistiõxõ ã mato yoiyamea. Ëa shinãxõ ã mato yoiyameama. Niospa ea shinãmanaino ã mato yoiyamea. ² Ë matoki oyoxoma ã shinãkĩ iskafani: “Jesucristo ifi cruz ikakinoax noko nãxoni, nã fisti ã ato yoixikai. Afaa fetsa ã ato yoitiromaki,” ixõ ã shinãyamea. ³ Askata mẽ nokoax ã matoki ratekõiyamea. Nãskakĩ rateyanã ã shinãyamea iskafakĩ: “Ë mitsisipama ea õikakĩ ea nikakaspapirofo,” ixõ ã shinãyamea. ⁴ Nãskakẽ ã mato Jesucristoõnoa yoimis ãfe shinãmã shinãxõ ã mato yoitamaro ko Niospa Yõshi Sharapa ea shinãmanaino ã mato yoiyamea. Ë mato yoiaino aõxõ mã Jesús chanĩmara fayamea. ⁵ Akka yõra shinãõxõ mã Jesús chanĩmara fayameama. Niospa shinãõxõ mã chanĩmara fayamea.

Niospa Yõshi Sharapa noko shinãmasharatiro

⁶ Nãskakẽ a Niospa meka nikasharaifãfe mã tãpiafo nõ Niospa Yõshi Sharaõxõ xafakĩakõi nõ ato yoiaito. Nãskaifono fetsafãferi kirika kene tãpisharakõifikaxõ Niospa shinãi keskara tsõa anori shinãima. ãto shinãõxõkai Niospa meka nõ mato yoima. ãto xanĩfofofãfe shinãifo keskararikai nõ mato yoima. Akka ãto xanĩfofo mã chaimashta

tsekekani. Anã afo xanĩfo ikanima. Nã xanĩfofãfe shinãifo keskara mã keyoi. A shara shinãifo keskara shinãkanaxma. ⁷ A nõ mato iskaratĩa Niosxõ yoia tsõa tãpiyopaonima. Niospa mai onifayoxoma shinãkĩ iskafani: “Ëfe Fãke ato chipo nãxoxii nã chanĩmara faafo tii ato nimapakexixakĩ,” ixõ shinãni. ⁸ Ë na meka mato yoiai keskarakai xanĩfofãfe tãpiyopaonifoma. Nãskaxõ Jesús retenifo. Akka tãpikaxokai tsõa nõko Ifo Cristo ifi cruz ikaki mastakeranifoma. Nã nõko Ifo Cristo sharafinakõia. ⁹ Akka yõra kirika kenekĩ iskafani:

Afama mĩshti shara Niospa ato axoxii. Tsõa õiyomisma sharafo ato axoxii. A tsõa nikayomisma ato axõfãi a tsoa pishta ãto shinã mëraxõ shinãyomisfoma nãfo ato axosharaxii. A ato noiaifo ato itipinĩshara faxoxii, nãskara yoikĩ Niospa meka yõra kirikaki keneni. ¹⁰ Nã kirika kenekĩ yoinifo keskarakõi Epa Niospa ãfe Yõshi Sharapa noko õimani. Æfe Yõshi Sharapa keyokõi tãpikõia. Epa Niospa shinãi keskarari ãfe Yõshi Sharapari tãpikõia.

¹¹ Yõra ãfe shinã mëraxõ ãa shinãitokai tsõa tãpitiroma. Akka ares fisti tãpitiro. Nãskarifiai Epa Niospa shinãi keskara ãfe Yõshi Shara fistichi tãpikõia. ¹² Epa Niospa ãfe Yõshi Shara nokoki nĩchini noko tãpimapaiyai keskara noko tãpimanõ. Akka nã chanĩmara faafãfema Niospa meka nikakanima. Nãfãfe shinãi keskarakai Niospa noko shinãmanima.

¹³ Nãskakẽ yorafãfe noko tãpimanifo keskara nõ mato yoitamaroko Niospa Yõshi Sharapa nõko shinã mëraxõ noko shinãmana keskara nõ mato yoimis. Æfe meka chanĩmakõi fisti. Nãskakẽ

nōri aōxō nō mato chanīmakōi Niospa mekakōi tãpimani. Nã meka shara mã nikamis mãmãi Niospa Yōshi Shara mato fe rafeano.

¹⁴ Akka fetsafo Niospa Yōshi Shara fe rafeyamano nãfãfe Niospa Yōshi Sharapa yoiiai keskara nikakaspakani. Nãskaxō iskafatirofo: “Tsōakai nã meka chanīmara faima. Akka nã shara shinãifãfe chanīmara fakanima,” ixō shinākani. Akka Niospa Yōshi Sharapa shinãi keskara tsōa tãpiama. Nãskakē Niospa Yōshi Shara ato fe rafeyamano a yoiiai keskara tãpiafoma. Akka Niospa Yōshi Shara fistichi ato tãpimatiro chanīmara faifono. ¹⁵ Akka fatora fetsa Niospa Yōshi Shara afe ikano Niospa tãpimapaiyai keskara tãpitiro. Fatoformākī chaka shinãifo, askatari fatoformākī shara shinãifo Niospa Yōshi Sharapa ato tãpimatiro. Nãskakē a Niospa Yōshi Shara fe rafeyamato a Jesús chanīmara faifo ato tãpitirofoma. ¹⁶ Akka Isaías kirika keneni iskafakī:

Tsōakai nōko Ifãfe ãfe shinã mēraxō shinãi keskara tãpitiroma. Tsōakai nōko Ifo tãpimatiroma, ixō kirika keneni. Askafiaifono nã nō Cristo chanīmara faifãfe a shinãi keskara nō tãpitiro nō afe rafexō.

3

Corinto anoafo Niospa Yōshi Shara fe rafeafoma

¹ A fake rama kãiatokai afaa tãpitiroma. Mã yosixō tãpitiro afara fetsa. Nãskarifiiai a rama Jesús Ifofaifãfe Niospa meka tãpisharafoma a fake yome rama kãia keskarafoma. Nãskarafoma Jesús mato Ifo fiano ranãrito ãfe meka mã tãpisharama. Mã rama Jesús Ifofayamafiai oa

rama Jesús Ifofaifo keskarafoko, mā. Niospa meka mā mā nikafikatsaxakī a yoiyai keskara mā nikasharama. Ooa efe yora mīshtichi, māfi Niospa meka nikamisma keskarafoki, rama Jesús Ifofaifo keskara. Māfi nā Niospa Yōshi Shara fe rafeama keskarafoko. Nāskakē ē mato Niospa meka tāpimasharatiroma mākaikoro itipinīsharakē nikasharaxikima. ² Fake yome rama kāiato chocho fisti atiro, afaakai pitiroma. Nāskarifiakī Niospa meka mā nikapaifikī āfe meka mā nikasharatiroma. Nāskakē āfe meka ichapa ē mato yoiyotiroma. Āfe meka fetsafori ē mato yoipaiaino mā nikasharaima. Nāskax māka itipinīsharapaima Niospa meka nikasharaxikima. ³ Māfi nā Niospa Yōshi Shara fe rafeama keskarafokī. Nāskaxō fetsafo mā ato xītipai mā ato keskara ipaikī. Nāskax mā fochishpanā faatanāi mā ika. Nāskaxō yōra shināi keskara mā shināi. Akka Niospa Yōshi Sharapa mato shināmapaiyai keskara mā shināima. ⁴ Mā fatora fetsafāfe yoikī iskafai: “Nōfi Pablo ifofakī. Pablo fistichi noko tāpimasharatiroma,” ixō mā yoimis. Akka fetsafāferi mā yoikī iskafai: “Nōfi Apolos ifofakī. Apolos noko shara yoitiro,” ixō mā yoimis. Nāskax mā fochishpanā faatanāpai. Nāskaxō yōra shināi keskara mā shināi. Askarafokai Niospa Yōshi Sharapa mato shināmanima.

⁵ Akka askayamakāfe. Nō afaama. Akka Apolos fetakai nō afaa tāpiama. Nōkai Nios keskarama. Akka nōfi āfe inaki. Nāskaxō nō mato Jesús chanīmara famani. Nōko Ifo Niospa noko katonī noko yonomapaiyai keskara nō yonoxonō. ⁶ Ē mato iskafakī yoipai. Yora

fětsa taefakī xiki fanatiro. Fetsafāfe a nāmā orometirofo foaisharanō. Nāskafixokai nā rafeta xiki foaimatirofoma. Nios fistichi xiki foaimasharatiro. Nāskarifiakī ē mato taefakī Jesucristo chanīmara famani. Chipo Apolos Cristoōnoa mato yoini āfe meka mā nikasharakōinō. Nō mato yoiaino Nios fistichi mato shinā mēraxō mato shināmasharatiro āfe meka mā tāpisharakōinō. ⁷ Nā ē mato yoiaito mā nikai keskara Apolos feta nō afaa tāpiama. Akka Nios fistichi yorafo shināmasharatiro āfe meka tāpisharakōinōfo. ⁸ Akka taefakī fetsafo Jesús chanīmara famano, a chipo ato yoiaitori nānorikōiri ato yoi. Nā rafetamāi nānorikōi shinākakī Niospamāi ato shināmanaino. Nāskakē ato Jesúsnoa yoixikani a Ifofasharanōfo. Nāskatari Niospa a yonoxonafo ato afara ināxii. Fetsa ichapa ināta fetsafori ichapama ināxii yonoxosharafomano. ⁹ Efe yora mīshtichi, ē meka fetsa mato yoipai. Tarepa ifo fistifiano fetsafāferi yonoxotirofo. Askatari pexe ifo fistifiano fetsafāferi yonoxotirofo. Nāskarifiāi māfi Niospa āfe tare keskarafokī. Askatari mā āfe pexe keskara. Nios fisti mato Ifo. Akka nōri Apolos feta yonoxomiski. Noko yoiai keskara nō mato tāpimasharani āfe meka mā nikasharakōinō.

¹⁰ Ē mato yoinō afeska faxō pexe fatirofomāki. Taefakī āfe kishi kerexkōi fikaxō nīchitirofo. Mā kishi nīchikaxō aōxō yonotirofo. Nāskarifiāi māfi pexe keskaraki. Akka nō mato Niospa meka tāpimani nā pexe faifo keskara. Cristofi pexe kishi keskaraki. Nā āfe kishiōnoax pexe nitiro. Nāskarifiakī Cristo mato nimai. Ea Niospa

tāpimashara keskarari taefakī ē mato yoiaito mā Cristo Ifofani. Askatari fetsafāferi nānorikōi mato yoikani mā Cristo Ifofasharanō. Nāskata nā fetsafo ē ato yoimis iskafakī: “Shināsharata ato mēstekōi yoisharakāfe,” ixō ē ato yoimis. ¹¹ Ē mato taefakī Cristoōnoa yoini mā Ifofanō. Akka tsōakai mato yoikī iskafatiroma: “Ē mato meka fetsa tāpimanō mā chanīmara faax Nios fe ĩpaxanō,” ixō tsōa mato anori yoitiro. Jesucristo fistichi noko nimasharatiro nō Nios fe ĩpaxanō. ¹² Afara fetsa anā ē mato yoinō, ea nikakapo. Fētsa pexe fakī kishi kerexkōi nīchitiro. Akka fētsari akiki rofetaxō kerexkōi kenetirofo. Fētsari akiki oro kenetiro. Fētsari akiki tokiri sharakōi kenetirofo. Askatari fētsari akiki ifi kerexma kenetirofo. Fētsari xepa pei akiki kenetirofo. Fētsari tafa akiki kenetiro. Nāskakē nā pexe kooaino pexe ano ikafo ichotirofo kooyamaxikakī. Akka pexe kishi kerexkōi akiki keneafō oro akiki keneta, roe taxo akiki keneta, tokiri sharari akiki keneafono kootirofoma. Akka nā ifi kerexma kootiro. Xepa peifori kootiro. Tafari kootiro. ¹³ Nāskarifiai Nios nā pēxe ifo keskara. Niospa meka yoimisfo nā pexe ifo pexe faxōaifo keskarafo. Fetsafāfe shara faxomis, fetsafāferi shara faxomisma. Nāskaxō anā oaitīa Cristo noko ōimaxii nā nō axomis keskara fatofō keyonakamakī. Akka fatofori nipanakafomākī. Noko ōimaxii afeskaxō nō Nios yonoxonamāki. Fētsa Jesús Ifofasharaxoma āa shināxō Niospa meka ato yoisharaima, tāpisharaxoma ato yoisharatiroma. A yoiyai keskara sharama, ifi kerexma keskara, samama keyotiro. Akka fētsa Niospa mekakōi ato yoi. Niospa shināmanaino ato tāpimani. Nā tokiri

kerexkōi keskara keyotiroma. ¹⁴ Nāskatari fatotora Nios yonosharaxonano Niospa afara shara ināsharaxii nā Jesús oaitīa. ¹⁵ Akka fatotorari Nios yonosharaxonamano Niospa afara shara ināima. Nāskafiax Nios fe ipanaka. Āa kaxpa yonokatsaxakī akka āfe yono keyoxii.

¹⁶ Akka, ĵmā tāpiamamē mā Niospa pexe keskarakōi? Āfe Yōshi Shara mato mēra ika. ¹⁷ A Nios ika anokai afaa chakama. Nāskakē āfe Yōshi Shara mato mēra ikano ōisharakāfe chaka shināi iyamakāfe. Mā afe nīpaxanō Niospa mato katoni afe yora mā inō. Nā Ifofaafo tii ato shara imai. Akka fatotora ato anorima yoikī ato afara chakafamaino Niospa kopikiri omiskōimaxii.

Cristo noko tāpimasharatiro

¹⁸ Efe yora mīshtichi, iskafakī shināyamakāfe: “Nā Jesús chanīmara famafāfe kirika raiskakī afama mīshti tāpisharakōiafo. Nōri ato keskaraxō anori shinākī tāpikōia,” ixō anori shināi mā pārameyamakāfe. Jesús chanīmara famafāfe shinākakī iskafakani: “Nā Jesús chanīmara faafāfe shināsharakanima,” ixō nokoōnoa yoimisfo. Matoōnoa anori yoifiaifono Niospa mato mēstekōi shināmasharapai mā shinātiro. ¹⁹ Nā Jesús chanīmara famafāfe shinākani iskafakakī: “Nōfi mēstekōi shināsharakī,” ifiaifāfe Niospa ato ōia mēstekōi shināsharakanima. Tatima keskarafō ato ōi. Nānori yōra Niospa meka yoikī kirika keneni iskafakī: “Nā Jesús chanīmara famafāfe āa shinākani iskakakī: ‘Nōfi tāpikī finakōiaki,’ ixō shinākakī Nios pāratirofoma. Āakōi anori pāramekani. Nāskakanax fenoafo,” ixō Niospa meka

yōra kirikaki keneni. ²⁰ Anã David kirika keneni iskafakī: “ ‘Nōfi tāpisharakōiaki,’ ifiaifāfe nōko Ifo Niospa ato tāpikōixō yoikī iskafatiro: ‘Nafāfekai mēstekōi shināsharafoma, tatima keskarafō,’ ” ixō David kirika keneni.

²¹ Nāskakē anã yoi iskayamakāfe: “Na feronāfāke a noko tāpimamisto āfe meka fisti mēstekōi, sharakōi,” ixō anori anã shināyamakāfe. Niospa ato shināmayamainokai tsōa mēstekōi shinākeranama. Nios fistioxō nō mato mēstekōi yoitiro mā tāpisharakōinō. Keyokōi Niosnã, nã Niosnãri mātonã. Nāskakē aōxō mato shara faxōi. ²² Ē ikaino, Apolos ikaino, Pedro ikaino nō Nios yonoxomis. Āfe meka nō mato yoimis mā nikasharanō. Askatari naax mā afe ĩpaxanō. Keyokōi Niosnã, askatari nã Niosnãri mātonã. Iskaratīa afara sharafo ikai aōxō Niospa mato shara faxōi. Nã chipo ixiaifori aōxori Niospa mato shara faxoxii. Keyokōi a Niospa onifanifo mātonãri. Nāskakē māri āto ifo ixii. ²³ Akka Cristofi mato Ifokī. Cristori āfe Ifori Nios.

4

Cristo yonoxomisfāfe afeskaxō yonoxotirofomāki

¹ Akka mā nokoōnoa shinākī iskafatiro: “Nafāfepi Cristo yonoxomisfokī,” ixō nokoōnoa yoikāfe. Cristoōnoa meka shara tsōa nikayomisma Epa Niospa nōko shinã mēraxō noko shināmanaino nō atori tāpimani. ² Akka āfe inafāfe āfe ifo nikakōitirofo. Āto ifāfe ato yoia keskara axosharatirofo. Akka nōfi Cristo āfe inafoki. Niospa noko yoini iskafakī: “Ē mato yoia

keskara ato yoikāfe ato fomākakīma. Ato yoikāfe xanikakīma,” ixõ noko yoimis. ³ Nios fistichi tãpikõiakī nã ea yoia keskara ã aki. Akka yorafãfe ea mekafakī chakafakani. Akka fetsafãferi ea yoisharakani. Nãskanõki ãa ea mekafanõfo. Ë ãto yonomatimaki. Akka ã Niospa yonomatiki. Akka Nios fistichi tãpia ã yonoxosharakõiaito. Yorafãfekai tãpiafoma. Ërikai tãpiama. ⁴ Ëfe shinã mëraxõ ã shinãi iskafakī: “Ea Niospa yoiai keskara ã aki,” ixõ ã anori shinãfiaino nõko Ifo fistichi ea tãpikõia a ea yoia keskara ã ayamakī ã akima. ⁵ Cristo anã oyoamano iskafakī yoiyamakãfe: “Nãfãfekai Nios yonosharaxokanima,” ixõ anori yoiyamakãfe. Akka yora fëtsa shinãi keskara tsõa tãpiama. Shinãkapo. Nõko Ifo anã oaitãa keyokõichi noko õiaifono nõko shinã mëraxõ nõ shinãmis keskara nõko Ifãfe ato õimaxii. Anãkai nõ afaa pishta nõ fomãxiima, Niospamãi keyokõi tãpikõikë. Nã nõ afara shara nõ one axomis tsõa õiyamaino, askatari nã nõ afara chakafamis nãfo keyokõi Niospa noko kãimaxoxii. Askatari nõ afara shara faino Niospa noko yoikī iskafaxii: “Aicho. Ë mato yoia keskara mã amis. Mã sharakõi,” ixõ noko yoixii.

⁶ Efe yora mīshtichi, nãnori ã mato yoi mã ishara-nõ. Yõra kirika keneni keskara a Niospa yoiai nã fisti ã aki. Nã Apolosri Epa Niospa yoia keskara fisti aki. Nõ askafaito mã noko õixõ nõ akai keskara mãri akãfe. Nãskakë iskayamakãfe: “Nã noko yoimisto ãfe meka sharafinakõia, fet-safo keskarama. Akka nõ fetsafo nikapaima,” ixõ anori shinãyamakãfe. ⁷ Akka Niospa keyokõi noko onifani. Nõ Nios fistiõxõ afara fetsa nõ ato

sharafaxonõ. Nãskaxõ, “Nã ã akai keskarakai tsõa atiroma,” ixõ shinãyamakãfe. Nãskax kakapaimis iyamakãfe.

⁸ Mã shinãkĩ iskafamis: “Nõ Niospa meka tãpikõia. Nõ fetsafo finõkõia. Nãskaxõ nõ anã tsoa fichipaima noko tãpimanõ. Nõfi Cristo fe xanĩfo keskaraki. Nõ yorafãfe ãto ifo keskarakĩ,” ixõ mã shinãi. Nãskapainõra mã xanĩfokõifo iki. Mã xanĩfokõifo ikaino nõri mato fe xanĩfo ikerana. Akka nõ xanĩfoma. Noko tsõa ifofaima. ⁹ Ë afara fetsa mato yoipai, nikakapo. Karaxa mẽra iki-afo ato retematirofo. Yora ichapafãfe õiaifono ato retematirofo. Nãskarifiakĩ nõri ato keskara. Noko Jesús nĩchini nõ aõnoa meka shara nõ ato yoinõ. Nõ Jesúsnoa yoiax nõ Jesúsnoax omiskõiaino keyokõi yorafãfe noko õikani. Niospa ãfe ãjirifãferi noko õikani. Nõ yora mitsisipama noko õikani, nõkairoko xanĩfofo keskarakẽ. Nõ ãto nãmã rakakõia noko õikani.

¹⁰ Nãskakẽ ã Jesucristo Ifofamis. Akka mã ea yoimis: “Pablo afaa tãpamara,” mã ea famis. Askatari, “Nõ Jesús Ifofakĩ nõ tãpisharakõia,” mã imis. Askafixõ mã tãpisharakõiama. Nãskaxori mã ea yoimis, “Na Pablo afaa afeska fatiroma. Akka nõ afarafo nõ atiro,” mã imis. Askafixõ mã askafatiroma. Mã shinãkĩ sharakõi mã meei. Akka ea mã õia ã afaamakõi mã ea õimis. ¹¹ Akka iskaratĩari nõfi fonãiyanã nõamaikĩyanã rapati shara safeyamata nõ imis. Askatari noko koshamisfo. Akka pexemais ixõ Niospa meka fisti nõ ato yoifofãsafamis. Nãskax nõ omiskõi. ¹² Nãskaxõ nõ kerexkai yonotiro a nõ piai fixiki. Nãskatari yorafãfe noko mekafakĩ chakafaifono ato kopitamaroko nõ tenemis.

“Jesús mato shara faxopainō,” ixō nō yoimis. Noko omiskōimafiaifono nō tenemis. ¹³ Askatari noko i'chaifāfe ato kopitamaroko Niospa meka shara nō ato yoimis. Nāskakē iskaratīa noko chakafakani, “Māfi nā afamafo keskarakī, nā afara chaka potafo keskara,” ixō nokoōnoa yoimisfo.

¹⁴ Nāskakē ē mato nānori yoikī kirika kenexō ē mato rāfimapaīma. Askatamaroko ē mato shināmasharapai. Akka māfi ēfe fakekōifo keskarafoki. Ē mato noikōi. Nāskakē ē mato yoisharapai anā mā anorima shināyamanō. ¹⁵ Yora ichapato mato Cristoōnoa tāpimakani. Akka ē taefakī mato Cristoōnoa tāpimayoni. Nāskakē mā Cristo chanīmara fani. Eōnoax mā Niospa fakekōifo. Nāskatari ē mātō epa keskarakōi. Fetsafāfe Cristoōnoa mato tāpimafiaifono afokai mātō epa keskarama. Akka ē fisti mātō epa keskarakōi. ¹⁶ Nāskakē nā ē ikai keskakāfe. Ē Nios Ifofasharai keskakakī māri askakāfe. ¹⁷ Nāskakē ē Timoteo matoki nīchikai. Ē Timoteo Cristo chanīmara famaki taefani. Nāskax ēfe fake keskarakī. Ē aō noikōi. Nōko Ifo Jesús yoiai keskarakōi nikakōi. Ē Jesucristo Ifofai keskara Timoteo mato shināmaxii mā shināmakinōma. Nā chanīmara faafo pexe rasi tii anoafo ē ato tāpimani keskara Timoteori mato tāpimaxii.

¹⁸ Mē tāpia mā ranārīto shinākī iskafai: “Pablo Timoteo nokoki nīchi nokoki mesekī. Āakai nokoki opaima. Akka nō keyokōi tāpikōia. Nō Pablo yopaima,” ixō mā shināi. Askai mā kakapaimis. ¹⁹ Anori mā shināfiaino ē samamakōi ē mato ari kaikai. Niospa ea yoiaino ē samamakōi mato ari kai. Mē mato ano nokoōxō ē tāpixii nā

kakapaimisfāfe Niospa Yōshi Sharaōxō yoikanimākai, āakōi yoimismomākī. ²⁰ Nios nōko Ifono nō meka fisti yoitamaroako āfe shinā sharaōnoax nō isharatiro. ²¹ Nāskakē nā ē matoki nokoaitīa āfe shinā sharaōnoax ē matoki nokoxii. Mē nokoxō ē tāpīxii afeskax mā ikamākī. Mā chaka xateyamakē Niosxō ē mato tāpīmaxii omiskōimakī. Akka mato chaka mā xatekē ē mato noikōikī fenāmāshta ē mato yoisharaxii. Nāskakē ē matoki nokoxō ē mato omiskōimayamano fenāmāshta oi tsii faxō ē mato yoixii ea yoikāfe fato mā fichipaimākai.

5

Jesús chanīmara fafiakaxō afara chakafakani (Hch. 9.1-19; 22.6-16)

¹ Mē nika mato mēraxō feronāfake fistichi afara chakafaito. Akka, ¿afeskakī mā yoimamē anā afaa chakafayamanō? Nā feronāfake āpa āfi fe oxakī chakafai. Askara chakakōi. Nā Nios chanīmara faafoma tsoa askamisma. ² Ooa. Nā feronāfake mato mēraxō afara chakafai aōnoa rāfipaikānima, “Nō sharakōifora,” ixō mā yoimis kakapaiyanā. Akka, ¿afeskakī nā feronāfakeōnoa mā shināchakaimamē? Akka nāskaxō āfe chaka xateyamax anā mato fe ichanāito potakāfe anā mato fe ichanāyamanō. ³⁻⁵ Ē mato fe iyamafīaxō ē mato shinākōi. Ē ano mato fe iyamafīaxō nā feronāfake afeskaimākai mē tāpīkōia. Ē mato anoxō yoikī iskafakerana: “Mā Jesucristo shināyanā ichanāino Niospa āfe Yōshi Sharaōxō nā feronāfake āpa āfi fe imiskē mato makinoa potakāfe Satanás ifofaafō mēra inō. Nāskakē Satanás nā feronāfake omiskōimanō. Nāskaxō Satanás nā apaiyai keskara

faxii nã feronãfake. Nãskafaino omiskõixii. Satanás omiskõimanaino ãfe chaka xatepaixii Jesús anã Ifofapaikĩ anã omiskõiyamaxiki. Mã ãfe chaka xateano nõko Ifo Jesucristo anã oaitĩa nã feronãfake ifixii afe ipaxanõ anã omiskõinõma,” ixõ ẽ mato yoikerana ẽ mato fe ixõ.

⁶ Ooa, mã iskamis: “Nõ sharakõi,” ixõ mã shinãfikĩ mãkai nã feronãfake mato mẽranoa mã potapaima afara chakafafaito. ¿Mã tãpiamamẽ, yora fistichi mato mẽra ixõ afara chakafaito mã xatemayamax aõnoax keyokõi mã chaka itiro? ⁷ Ẽ mato afara fetsa yoipai. Nikakapo. Kẽromã pãa fakĩ levadura aya osiano keyokõi faraxitiro. Pishta aya osiano keyokõi faraxitiro. Nãskarifiakĩ fẽtsa mato mẽraxõ afara chakafaito mã xatemayamax aõnoax keyokõi mã chaka itiro. Nãskakẽ nã yora fistichi afara chakafaito potakãfe mato mẽraxõ anã afara chakafayamanõ, mã fena keskara ixikakĩ. Akka Niospa Fake, Jesucristo, noko nãxoni nõko chaka noko soaxoxiki. Nãskakẽ mã afaa chakafamisma keskara. ⁸ Nãskaxõ a nõ chakafapaoni anã nõ shinãpaima. Fetsafo fekaxtefayamata ato pãrayamata meka chanĩmakõi fisti nõ ato yoitiro.

⁹ Ẽ mato kirika kenexoyoni iskafakĩ: “Feronãfakefo ãto ãfima fe imisfo. Askatari kẽrofori ãto fenema fe imisfo. Askarafo yorafo fe rafeyamakãfe.” ¹⁰ Akka a Jesús Ifofafoõnoama ẽ mato kenexyonima. Nã Jesús Ifofaifoõnoa ẽ mato kenexoni. Akka faki pishtakai iyamafoma a Jesús Ifofaifoma. Nãskakẽ nõ ato fe imis. Fakira kaxõ nõ õimis nãriri ikafo a Jesús Ifofaafoma. Nõ ato fe ifiaxõ afãfe akaifo keskarakai nõ amisma. Afãfe ãto ifo Satanás. Nãskaxõ ãto chaka xateafoma.

Chaka fetsa fetsatapafo amisfo. Nāskaxō āto āfimafo chotamisfo. Kērofori nāskarifiamisfo āto fenema fe chotanākani. Afama mīshti fipaikata āfenāfoma fipaimisfo. Nāskatari yometsokōifo imisfo. Nāskakata nioskōiyamafekē, “Na nōko niosra,” ikaxō afara kīfimisfo. Nāskafaifono nō ato feta afaa chakafamisma. Nāskafikē nō ato fe imis. Nō ato makinoax faki paxkatiroma. ¹¹ Akka mā efeta Nios Ifofaino ē mato kirika kenexoyoni. Nāskakē fatatora yoikī iskafatiro: “Ēri mato feta Jesucristo Ifofai,” ixō yoifixō āfe āfima chotamis. Kērofori askari amisfo āfe fenema fe chotanāmisfo. Askatari afama mīshti fichipaimisfo. Atonāma fipaimisfo. Nioskōiyamafekē afara kīfimisfo. Yora fetsafo chakafamisfo. Pāemisfo. Yometsomisfo. Askarafo fe rafeyamakāfe. “Nō Jesús Ifofaira,” ifiakaxō afara chakafamisfokī. Askarafo fe rafeyamakāfe.

¹²⁻¹³ Nā Jesús Ifofaifāfema afara chakafaifāfe nō ato yoitiro ma omiskōinōfo. Akka Nios fistichi ato yoitiro iskafakī: “Mā afara chakafamis. Nāskaxō māto chaka mā xateyamaito ē mato omiskōimaxii,” ixō Niospa ato yoitiro. Akka nō ato yoitiro ma. Nāskakē Niospa noko yoia nā Nios Ifofaa fet-safāfe afara chakafaifono nō ato yoitiro āto chaka xatenōfo omiskōixikakima. Akka Niospa meka yōra kirikaki keneni iskafakī: “Nā feronāfāke mato mēraxō afara chakafamis yoikāfe anā mato fe ichanāyamanō āfe chaka xateyamax,” ixō kirika keneni.

6

A Nios Ifofamisfo rafeta fētsa chakafaino fētsa

chakafayamafaito, askara achixõ a xanĩfo Nios Ifofaama ano iyotiroma ato yoinõ

¹ A mato feta Nios Ifofaafoma ato yõayamakãfe xanĩfofo yoikĩ a xanĩfofofãfe Nios Ifofaafomaki. Askatamaroko nã Nios Ifofaafoma ano ato iyokãfe ato yõkanõfo mato chakafafomakĩ. ² Akka, ¿mã tãpiamamẽ mã Nios Ifofaxõ mã nõko Ifo nokoaino mã xanĩfo keskara mã ixii? Nãskaxõ mã ato yoixii fatofomakĩ shara imisfo. Askatari mã yoixii fatofomakĩ chaka imisfo Niospa ato omiskõïmanõ. Nãskakẽ iskaratĩari fẽtsa pishta chakafaano mã ranã yoinõnãsharakãfe xanĩfofoki chanikakĩma. ³ Askatari mã Nios feta yoixii ãfe ãjirifo fatofãfe sharafafomakĩ, askatari fatofãferi chakafafomakĩ Niospa ato omiskõïmanõ, a chakafamisfo. Nãskakẽ iskaratĩa mã mã ato õi fatofomakĩ chakafo fatoforimakĩ sharafo. Nãskakẽ mã ranã mã yoinõnãsharakãfe xanĩfofoki chanikakĩma a xanĩfofãfe Nios Ifofaafomaki. ⁴ A mato feta shara shinãifo mã ato ifitiro mato yoisharanõfo, mã fochishpanã faatanãino. Akka a Jesús Ifofaafoma mã ato ifitiro. ⁵ Afaa tãpiafoma mã ato ifiax mã rãfitiro. Akka, ¿a shara shinãifo mato fe ikafomamamẽ? Ëje, nãno ikafo a shara shinãifo. Nãskakẽ ato ifikãfe mato yoisharanõfo mã fochishpanã faatanãino. ⁶ Akka mã fochishpanã faatanãx, mã raenã faatanãsharamisma. Askakimaroko mã ato yõaxõ nã Nios Ifofaafoma ano mã ato iyomis xanĩfofofãfe ato yõkanõfo.

⁷ Mã ranã mã fochishpanã faatanãx nã Nios Ifofaafomaki mã atoki chanimis. Akka askarakai sharama. Nãskakẽ Jesús Ifofaa fẽtsa mato

chakafaito kopitamaroko a Jesús Ifofaafomaki mā chaniroma. Nāskax mā shara itiro. Askatari a Jesús Ifofaa fētsa matoki yometsoano nā Jesús Ifofaafomaki mā chaniroma āa matoki yometsonōfo. Nāskax mā shara itiro. ⁸ Akka mā ranā mā yometso faatanāmis chaka faatanāyanā. Askatari mato fe yorafori mā ato chakafamis.

⁹ ¿Mā tāpīamamē a yora afara chakafamis Nios xanīfo ano katiroma? Nāskakē māri mā pārameyamakāfe. Mā afara chakafaax Nios xanīfo ano mā katiromaki. Akka nā āto āfima chotamisfo Nios xanīfo ano fotirofoma. Askatari kērofori āto fenema chotamamisfo Nios xanīfo ano fotirofoma. Nāskatari nioskōiyamafekē afara fetsa fichipaikī, “Na nōko niosra,” ixō fichipaimisfo. Afokai Nios xanīfo ano fotirofoma. Askatari feronāfakefo aa ranā chotanāpaimisfo. Kērofori nāskari amisfo aa ranā chotanāpaikani. Afokai Nios xanīfo ano fotirofoma. ¹⁰ Askatari yometsomisfo, atonāma fipaimisfo, pāemisfo, ĭchamitsamisfo, nikayospamisfo, afara fētsa fītiāxō ato pāraxō afara fetsa fīamisfo. Nāskarafokai Nios xanīfo ano fotirofoma. ¹¹ Mā askapaonixakī iskaratīa mā mā Niospa afe yorafo. Niospa āfe Yōshi Sharaōxō mātō chaka mato soaxona nōko Ifo Jesucristo mā Ifofaito. Mātō chaka mato soaxoyanā āfe ōiti keskara shara mato imai. Askafaxō afaa chakafamisfoma keskara mato ōi.

Nō Cristo fe rafexō nō chakafatiroma

¹² Akka mā yoiraka iskafakī: “Cristo ēfe Ifo. Nāskakē a Niospa yoiyamano nā ē apaiyai keskara ē atiro, afaa chakama,” ixō mā yoiraka. Ĕje, nānorikōi. Askatamaroko afara shara fetsa fekē ē aki ē ifofatirora ixō ē apaima. ¹³ Askatari mā

yoiraka iskafakī: “Niospa nōko xāki noko onifaxoni a nō piāi nō pinō. Nāskaxori a nō piāi noko onifaxoni,” ixō mā yoimis. Akka chipo Niospa a nō piāi yafi nōko xāki yamafaxoxii nāatomāi a nō piāi noko onifaxonixakī. Chanīmakōi Niospa noko onifani nō afe rafepakexanō. Niospakai nōko āfima fe nō inō noko onifanima. Kērofori āto fenema fe inō ato onifanima. Askatamaroko Niospa nōko yora noko onifaxoni nō nōko Ifo fe nō rafepakexanō, Jesús āfe ina nō inō, nāskata Jesús nōko Ifo inō. ¹⁴ Nōko Ifo Jesús mā nafianikē Epa Niospa āfe shinā sharayaxō otofani. Nāskarifiakī āfe shinā sharayaxō nokori otofaxii.

¹⁵ ¿Mā tāpiamamē nō Cristo Ifofaax nō āfe yorakōi? Nāskaxō nō nōko āfima chotatiroma nōmāi Jesús afe yorakōixō. ¹⁶ Niospa meka yoikī yōra kirika kenekī iskafani: “Feronāfake kēro fe ikaino nā rafe yora fisti keskarakōi itirofo,” ixō keneni. ¿Mā tāpiamamē, nā mātō āfima fe mā ikī yora fisti keskara mā itiro? Nāskakē mātō āfima fe iyamakāfe mā chakanatiroki. Askatari kērori fene fetsa fe itiroma. ¹⁷ Nāskax nō nōko Ifo Jesús fe rafeax nā yora fisti keskara nō ixii. Niospa āfe Yōshi Shara nokoya rafemaxii. Nāskax nōko fero mēsho nā fisti keskara ixii Niospa Yōshi Shara fe rafeax.

¹⁸ Nāskakē mātō āfima fe ipaiyamakāfe. Askatari kērofori mātō fenema fe ipaiyamakāfe. Askara shināyamakāfe. Askapaikakīma ato makinoax ichotakāfe mātō āfima fe ixikakīma. Mā chakanatiroki. Askatari kērofori ichotakāfe mātō fenema fe ipai kakīma mā chakanatiroki. Akka mātō āfima mā chotakī mātō yora mā chakanafatiro.

Askatari afara chaka fetsa akĩ m̃to yora m̃ chakanafatiroma, afara chaka afiakĩ m̃ chakanatiroma. ¹⁹ M̃ t̃piamamẽ Niospa Yõshi Shara nofe ika? Nõko yora ãfe pexe keskarakõi. Nãskakẽ Niospa Yõshi Shara nõmẽra ika nãm̃i nõko Ifofaax. Nãskax m̃kõi m̃ ifofametiroma. Akka Nios m̃to Ifo. ²⁰ Jesucristo mato nãxoni m̃to Ifo ixikĩ. Nãskax m̃ ãfe inakõifo. Nãskatari Nios m̃to Ifokõi. Nãskax m̃to yora Niosnã. Nãskakẽ Niosnã ixosharakãfe Niospa mato imapaiyai keskara. M̃ askafaito õikakĩ fetsafãfe, “Nios sharara,” fatirofo.

7

Afeskax feronãfake ãfi fe ishariatirofomẽ

¹⁻² M̃ ea kirika kenexõ femakĩ m̃ ea yõkaita. Nãskakẽ nã m̃ ea yõkai keskara ã mato yoisharapai m̃ t̃pinõ. Feronãfake kẽromaisax shara itiro. Askafiax ãfiypai ãfiyatiro chakafaxikĩma. Nãskax feronãfakefo ãfiyatirofo. Xotofakefori feneyatirofo. Nãskara shara. ³⁻⁴ Feronãfake m̃ ãfiyax ãfe yora anã ãfenã fistima. ãfe ãfinãri itiro. Nãskarifiyai kẽro m̃ feneyax anã ãfe yora ãfenã fistima. ãfe fenenãri itiro. Nãskakẽ ãfinĩ ãfe fene afe ipaiyaito fene ranĩtiroma. Nãskatari fenẽri ãfe ãfi afe ipaiyaito ranĩtiroma. ⁵ Nãskakẽ ranĩnõnãyamakãfe. Akka nãskaxõ m̃ shinãtiro iskafakĩ: “Nõ Epa Nios k̃fiyonõ, nõ paxkanõnãx oxa ranãyoxikĩ. Chipõ anã nõ kemãnãxikĩ,” ixõ m̃ yoitiro. Nãskafiax chai samarakayamakãfe. M̃ samarakaino Satanás mato chakafamatiroma m̃ kẽro fetsa fe ipaitirokĩ. Nãskarifiyai kẽrori feronãfake fetsa fe ipaitiro. Afe ipaikĩ chakafatiroma.

⁶ Ë mato, “Fianãkãfe,” ixõ ã mato yoima. Akka mã fianãpai mã fianãtiro. ⁷ Askata ã shinãkĩ iskafai: “Feronãfakefo ea keskara kërõmais ikanax shara itirofo. Niosnoax ã ãfiyamax ã isharai. Ë shinãchakaima. Ë inimakõi. Akka Niospa ea kërõmais ima keskarakai ato askafaima. Fetsafo Niosnoax ãfiyafo. Fetsafori kërõmais kanax nã ã ikai keskariai inimatirofo.”

⁸ Akka iskaratã nã kërõmaisfo yafi fenemaisfo ã ato yoinõ. Feronãfakefo ea keskara kërõmais itirofo. Askatari kërõfori fenemais itirofo. Askara shara. Askatari ãto fene ato makinoax namis, afo anã feneyatirofoma. Ea keskara shara itirofo. ⁹ Akka feronãfake ares ixõ teneyamai kërõ fe ipaikĩ fatora kërõ fe oxatiro. Askara sharama. Askatamaroko ãfiyatiro tanaima shara ixikĩ, anã kërõ fetsafo fe ipaixikĩma.

Feronãfake ãfe ãfi potatiroma, nãskarari kërõmãri ãfe fene potatiroma

¹⁰⁻¹¹ Askata iskaratã feronãfake ãfiya ã yoipai, xotofãke feneyari ã yoisharapai. Ëa ã mato yoima. Nõko Ifoõxõ ã mato yoi iskafakĩ, kërõmã fene enetiroma. Mã fene eneax fetsa fe fianãtiroma. Ares itiro. Akka askayamai anã feneki kematiro. Askara shara itiro. Askatari feronãfake ãfi enetiroma.

¹² Nãskakẽ iskaratã keyokõi ã mato yoisharapai. Na meka ã mato yoiã Niospa ea yoiyamafekẽ ã mẽstekõi shinãkĩ ã mato yoi. Feronãfake Jesús Ifofaino ãfe ãfinĩ Jesús Ifofaxoma fene noikĩ fene enepaiyamaino fenẽ ãfe ãfi potatiroma. ¹³ Askatari ãfe ãfinĩ Jesús Ifofaino fenẽ Jesús Ifofaxoma ãfe ãfi enepaiyamaino ãfinĩ fene enetiroma. ¹⁴ Feronãfake

Nios chanĩmara faimano afe aĩfinĩ Nios chanĩmara faino afe aĩfiõxõ Niospa nã feronãfake shara faxotiro. Nãskaxõ afe aĩfinĩ Jesús Ifofaito õikĩ aĩfiõxõ fenẽ Jesús Ifofatiro. Nãskatari kẽromã Jesús Ifofayamaino fenẽ Jesús Ifofaino feneoxõ Niospa nã kẽro shara faxotiro. Akka feronãfake fe aĩfi enenãifono aĩto fakefo shara itirofoma. Akka enenãyamaifono Niospa aĩto fakefo shara õitiro. ¹⁵ Akka feronãfãke Jesús Ifofayamakẽ aĩfinĩ Jesús Ifofaito fenẽ enepaikõikĩ enetiro. Nãskax kapaiyaito nẽtefayamafe. Katanõ. Mã nẽtefaino fekaxtetiroki. Askatari kẽromã Jesús Ifofayamakẽ fenẽ Ifofaito kẽromã enepaikõikĩ enetiro. Kapaiyaitori nẽtefayamafe. Katanõ. Mã nẽtefaino fekaxtetiroki. Niospa noko katonĩ nõko shinã mẽraxõ afanã noko fekaxtefanõma nõko õiti tanaimakõĩ shara inõ. ¹⁶ Kẽromã Jesús Ifofaxõ afe fenerĩ Jesúsnoa tãpimatiro aĩfinĩ fene yoĩaino fenẽ Ifofai rakikĩa nõ tãpitiroma. Feronãfãkerĩ Jesús Ifofaxõ afe aĩfiri Jesúsnoa tãpimaino Ifofai rakikĩa, nõ tãpitiroma.

¹⁷ Nã nõko Ifo Jesús mato ima keskara nãskara ikãfe. Akka Niospa mato ifini nã Jesús mato ima keskara mã inõ. Askatari nã Nios Ifofaafo tii Nios kĩfiti pexefã anoafoya nã maitio anoafori nãnorikõĩ ẽ ato yoimis. ¹⁸ Iskafakĩ ẽ ato yoimis. Judeofo Niospa ato yoini keskarakõĩ aĩto fake feronãfakefo foshki repa xatepaonifo. Akka mato foshki repa xatenifono Jesús Ifofaxõ shinãkĩ mã iskafatiroma: “Iskaratĩa ẽ Jesús Ifofai. Nã fistichi ẽfe chaka ea soaxonano ẽ afe ĩpaxanõ. Ooa, ¿afeskakĩ ea foshki repa xatenifomẽ, ẽ askayama-paifiaino? Aatokai ẽfe chaka ea soaxotiroma. Nãskakẽ ẽ foshki repa xateama keskaraxõ ẽ ato

fomãi,” ixõ shinãyamakãfe. Akka mãto foshki repa mã mato xatenifono shinãchakayamakãfe. Askatari mã Jesús Ifofaxõ iskakĩ shinãyamakãfe: “Judeofo ãto xinifãfe ato yoini keskara ã ipai. Ë foshki repa xatepai nã Moisés yoini keskara ã ixikĩ,” ixõ anori shinãyamakãfe. Nõ foshki repa xate-tiroma Niospa noko ifinõ. ¹⁹ Akka nõ foshki repa xatemisma askatari nõ foshki repa xatemis nãskara shara. Akka nõ askanokai, “Mã chakafaa,” noko Niospa faima. Askatari nõ askamanori, “Mã chakafaa,” noko Niospa faima. Nã judeofo imis keskarakai nõ itiroma noko Niospa ifinõ. Askatamaroko Niospa noko yoini keskara nã fisti nõ atiro. ²⁰ Akka nã Niospa mato ifini keskarakõi ikãfe. ²¹ Mã fẽtsa yonomati ikatsaxakĩ shinãchakayamakãfe. Nãskarakõi ikãfe. Akka mãto ifãfe mato nĩchipaiyaino, “Fotakãfe anã yonoxoxikakĩma,” mato faino mã katiro. ²² Akka nõko Ifo Jesús mato ifini. Mato ifiyoamano ranãri mã ãto yonomati iyopaoni. Iskaratĩari mã ãto yonomati mã ato yonoxomis. Mã askafixõ mã Jesús Ifofaano, Jesús mãto chaka mato soaxonano, ãfe yonomatikõifo mã iki. Nãskaxõ tsõa mato iskafatiroma: “Mãkai Jesús afe yorafoma,” tsõa mato fatiroma. Akka ranãritokai mã tsõa yonoxomisma. Askafiax mãri Jesús Ifofaax mãri ãfe yonomatikõifo. ²³ Epa Niospa ãfe Fake Jesusucristo noko nĩchixoni noko nãxoyonõ nãskax nõko Ifo inõ. Nãskax mã afe yorakõifo. Nã fisti mãto Ifokõi. Nã fistichi mẽstekõi mato shinãmasharatiro. Askaxõ fetsafo ifofayamakãfe mato shinãmasharatirofomaki. ²⁴ Efe yora mĩshtichi, Niospa mato ifiano nã mã ipaoni keskara ikãfe Epa

Nios mato fe ikaino.

Feronāfake āfimaifo kērofo fenemaisfoōnoa Pablo yoini

²⁵ Akka iskaratīa afara fetsa anā ē mato yoipai mā ea yōkaita. Feronāfakefo āfimaifo kērofo fenemaisfoōnoa ē mato yoi. Ē mato yoiai keskara nōko Ifāfe ea yoiyamafixō ea noikī ea nīchini ē āfe ina inō. Nāskakē ē mato yoiai keskara mā chanīmara fatiro. ²⁶ Iskaratīa afara mesekōikī noko omiskōimani. Nāskakē mā āfimaifo ika shara. Nios Ifoafāfema noko omiskōimapaikani nō Jesús Ifofakē. ²⁷ Akka āfiyakaxō mātō āfi eneyamakāfe. Askatari āfimaifoxō kēro fenayamakāfe. ²⁸ Akka mā kēroyaxō mā chakafatiroma. Kērofori feneyakatsaxakīma mā feneyaxō mā chakafatiroma. Askata mā feneyax askatari feronāfake mā āfiyak mato omiskōimanaifono mā omiskōitiro. Nāskaxō mato omiskōimatirofo mā Jesús chanīmara faino. Nāskakē ē mato yoisharapai mā omiskōiyamanō.

²⁹ Askatari ē mato iskafakī yoipai, efe yora mīshtichi. Nōko Ifo Jesús mā chaima oi kiki. Nōko Ifo nō yonoxokī nō chai faima. Nāskakē nō nōko Ifo yonoxosharakōipai. A āfimaifāfe nōko Ifo yonoxosharakōitirofo kēro shinākima. Askatari nā āfiyatori nōko Ifo yonoxosharatiro nā āfimaifāfe yonoxonaifo keskafakī. ³⁰ Askatari nā shināchakaifāfe nōko Ifo yonosharaxotirofo nā shināchakaifāfema yonoxonaifo keskafakī. Nāskatari nā inimaifāfema nōko Ifo yonoxosharatirofo nā inimaifāfe yonoxonaifo keskafakī. Askatari nā afara fiaifāfe shinātirofo iskafakī: “Na nōkonāma, akka na nōko Ifonā,” ixō shinātirofo. Akka nōko Ifo shinākōikī

nō yonotiro. ³¹ Nōko Ifo Jesús mā chaima oi kiki. Nāskakē nōko mai anoxō nō yonosharafafainō nā nō yopai fixiki. Nāskafixō afama mīshtifos shinākima nōko Ifokōiroko nō shinākōinō. Keyokōi mai anoafō keyoxikani. Nāskakē Jesús nō shinākī finakōikī afama mīshti fipaikī nō shinātiroma.

³²⁻³⁵ Ĕ mato anori yoi mātō shinā mēraxō afaranā mato fekaxtefanōma. Ĕ mato, “Āfiyayamakāfe,” faima. Askatari xotofakefori, “Feneyayamakāfe,” ě ato faima. Ĕ mato mēstekōi imapai nōko Ifo fisti mā shinākī finakōinō, mā afara fetsa shinānōma. Askaxō ě mato yoia keskara feronāfake āfimaisto āfe Ifo inimamapai. Akka feronāfāke āfiyaxō āfiri inimamapai. Āfinī afara yopaito fenē shināchakakī āfi fixotiro. Nāskakī āfe Ifo fistikai shinātiroma. Nāskaxō āfe Ifo inimamapaikī āfiri inimamapai. Askatari xotofake fenemaisto āfe Ifo Jesús fisti yonoxosharapai. Afara fetsakai shināima āfe Ifo fisti shināi. Niospa amapaiyai keskara fisti aki. Akka xotofake feneyaxō āfe feneri inimamapaikī afara fetsafori shinātiroma āfe Ifo Jesús fisti shinākīma.

³⁶ Nāskakē meka fetsari ě mato yoi. Feronāfāke taefakī xotofake yoiyoxō fichisharapaikī chipo fitiro āfe āfi inō. Shinākī iskafatiro: “Mē afetiama afe mekaitakī, mia fipa,” shināchakayamaxiki ixō fitiro, chaka shināyamaxiki. Nāskafakī afaa chakafaima. ³⁷ Askatari feronāfake fētša shinākī iskafatiro: “Ĕfe Ifo ě yonoxosharapaiyai keskara ě āfiyaxō ě axotiro. Nāskakē ě āfiyaima mē yoifixō,” ixō anori shinākī afaa chakafaima. Tsōa kerexkai, “Āfiyafe,

mã mĩ yoiaki,” fayamaino nã feronãfãke xotofake fe fianãtiroma Nios yonoxosharaxii. ³⁸ Akka feronãfãke nã xotofake fe fianãsharatiro. Akka nã xotofake fe fianãima nõko Ifo yonoxosharatiro. Nãskarari shara itiro.

³⁹ Askata meka fetsari ã mato yoi. Æfe fene naamanokai kãromã fene enetiroma fetsa fe fianãxiki. Akka mã fene naano fetsa fe fichinãpai afe fianãtiro nã Nios Ifofaa fe. Askara shara. ⁴⁰ Nãskatari ãa ã shinãkĩ iskafai. Mã fene naano fetsa fe fianãmax nãskarari sharakõi itiro. Æ shinãi Niospa Yõshi Sharapari nonorikõi mato yoipai.

8

Nioskõima onifakaxõ yorafãfe kãfipaonifo. Nãskaxõ nami inãpaonifo atoõnoa Pablo yoini

¹ Mã ea yõkaito ã mato yoisharatiro. Yora fet-safãfe afara onifakaxõ, “Na nõko niosra,” ikaxõ nami inãmisfo. Askata anã nã nami fikaxõ ato inãmisfo yorafãfe pinõfo. Akka yorafãfe ãto niosnã nõ nami pia, shara. Nõ piamari, shara. Nãskaxõ nõ afaa chakafaima. Akka mã yoikĩ iskafamis: “Mã nõ tãpia nõ ãto niosnã nami pia, shara. Akka nõ piamari, shara,” mãmãi shinãkĩ Nioskõimara ixõ. Akka mã fatora fetsafãfe shinãkĩ iskafamis: “Æfi tãpikõiyaki. Nã ã shinãi keskara ã mẽstekõi shinãi. Æ fetsafo keskarama. Æ apaiyai keskara ã atiro,” ixõ mã yoimis. Askara yoi kakapaimis mã itiro. Askara shinãkĩkai nõ fetsafo inimamatiro. Askakimaroko nõ yorafo noixõ nõ ãto õiti fepeaxosharakõitiro Jesús Ifofasharanõfo. Nãskakẽ nõ ato inimamatiro. ² Askatari fatora fẽtsa shinãkĩ iskafamis: “Æfi afama mĩshti tãpiakĩ,” ixõ anori yoifikĩ atiri afaa tãpiana. ³ Akka fatora

fĕtsa Nios noiaiino nāskarifikā Niospa aōnoa yoitiro iskafakī: “Nā ea noiai mē tāpikōia. Nāfi efe yoraki,” ixō yoitiro.

⁴ Nāskaxō yorafāfe afara fetsa onifakaxō, “Na nōko niosra,” ikaxō nami ināifo. Nā nami nō pitiro. Nā shara. Nō chakafaima. Akka nō piamari, shara. Akka mā nō tāpia a afara fetsa yorafāfe onifafo akai afama. Nā onifafotokai afaa tāpiama. Akai ōitiyama. Āfe māporikai afaa shinātiroma. Akai Niosma. Akka Nioskōi fisti. ⁵ Jesús Ifofaafāfema yoikī iskafamisfo: “Nios ichapa. Nai mēranoafoya mai anoafoya nios ichapakōi,” ixō yoimisfo. Akka nā āto nios ichapafix Nioskōifoma. ⁶ Mā nō tāpia Epa Niosfi fistiki. Fetsakai anoma. Nāato keyokōi onifani. Nokori onifani nō āfe fakefo inō. Nāskatari nōko Ifo Jesucristori fisti. Anā ano fetsama. Nāskaxō Niospa āfe Fake feta keyokōi onifani. Aōnoax nō nitiro.

⁷ Nā ĕ mato yoiai keskara fisti rasichi Jesús chanīmara faifāfe tāpiafoma. Shināmisfo iskafakakī: “A fetsafāfe afara onifafo, nā āto nioskōi nia,” ixō yoimisfo niyamafiakē. Akka āto xinifāfe nānori ato yoipaonifo. Nāskakē shinākani iskakakī: “Nā āto niosnā nō nami pixō nō Nioskōi chakafatiro,” ixō shinātirofo. Akka mā pikaxō āto shinā mēraxō shināchakatirofo: “Mā nō chakafara,” ikaxō. ⁸ Anori shināfiaifonokai a nō afara piatokai Nios yafi noko rafemasharatiroma. Nios makinoa noko potatiroma. Afara onifakaxō, “Na nōko niosra,” ikaxō nami ināfo nā nami nō piamanokai noko shara imatiroma. Askatari noko chakafatiroma. Nāskatari mā nō pianori noko chakafatiroma. Nāskatari noko shara

imatiroma.

9-12 Nāskakē mato feta Nios Ifofaafo afaa chakafamayamakāfe. Mā shināi iskafakī: “Nō keyokōi pitiro. Afara onifakaxō, ‘Na nōko niosra,’ ikaxō nami ināfo. Nā nami nō pitiro nā onifafokairoko Nioskōikē. Akka mā nō na nami pixokai nō āto nios chanīmara faima. Akka mā nō tāpia Nioskōima. Akka pixō Nioskōi nō chakafaima. Jesúsri nō kachikirifaima,” ixō mā shināi. Mā anori shināfiaino Jesús Ifofaa fetsafāfe anori tāpiafoma. Tāpiamaifono nā nioskōimato kīfiti pexefā anoxō mā piai fisti mā pipai mā kai āto nios ifofapaima, nāskakī mato ōikakī akairi apaikani. Akka mā mā tāpia yorafāfe āto niosnā nō nami pia shara, chakama. Akka fetsafāferi Nios Ifofafiakaxō yoimisfo iskafakakī: “Āto niosnā nō nami pia sharama, nō chakafatiro,” ixō yoimisfo. Nāskaxō mā nami piaito fetsafāfe mato ōikakī akairi afāfe nami pitirofo. Nāskaxō mā nami pikaxō chipo shinātirofo iskafakakī: “Ooa, mē nami pixō ēfe Ifo Jesús ē chakafaa ēmāi āto niosnā nami pixō. Nā nami pikī ē āto nios sharafai. Ē āto nios ifofai ōitsai. Ooa, ē chakafaa,” ixō shinātiro. Askaxō āfe shinā mēraxō shināchakakōitiro mā nami piaito ōikakī akairi pikaxō. Nāskakē mā chakafamatiro. Askafakī Cistori mā chakafai. Mā mā tāpia afara onifakaxō, “Na nōko niosra,” ikaxō nami ināifo nā pixokai mā chakafaima nā onifafokairoko Nioskōikē. Akka fetsafāfekai tāpiafoma. Afāfe shinākani: “Nā nami pixō nō chakafatiroki,” ixō shināmisfo. Akka mā piaito ōikakī akairi pikaxō shināchakatirofo. Mā akai keskafakīri

shinākani. Akka mā nā nami piyamainokai akairi pikeranafoma. Shināchakakeranafoma. Nāskakē mato fe yorafo noikōixō mā nā nami pitiroma ato chakafamaxikima. Akka atoōnoaxri Cristo naniki. ¹³ Nāskakē nō nami pixō Jesús Ifofaa fetsafo nō ato chakafamatiro. Nāskakē āto niosnā nō nami pitiroma fetsafo chakafamayamaxikī. Nāskakē nō fetsafo chakafamapaima. Nofeta Jesús Ifofaa fetsafo noikī nō afaa chakafamapaima.

9

Niospa Pablo nīchini āfe meka ato yoinō

¹ Nios fistifi ēfe Ifokī. Nā ea yonomapaiyai keskara ē atiro. Tsōakai ea yonomatiroma. Jesús ea nīchini ē aōnoa yorafo yoinō. Akka nōko Ifo Jesús mē ōisharakōini. Aōnoa ē mato yoiaito mā chanīmara fani. Nāskakē nōko Ifo Jesús ē yonoxonaōxō Jesús mā Ifofai. ² Fetsafāfe shinākakī iskafamisfo: “Niospakai Pablo nīchiamā Jesúsnoa noko tāpimanō,” ixō anori yoimisfo. Fetsafo mekaino anori shināyamakāfe. Ē mato yoiaito mā nōko Ifo Jesús chanīmara fai. Nāskakē mā tāpitiro chanīma Niospa ea nīchini ē mato Jesúsnoa yoinō.

³ A ea īchakakī mekafaifono iskafakī ē ato ke-matiro: ⁴ Fetsafāfe Jesúsnoa yoiaito nikakakī afaa kopi yōkaxoma kaxpa ato pimamisfo. Akka ē mato Jesúsnoa yoiaito nikakakī, ¿eari afaa kopi yōkaxoma kaxpa eari pimatirofomamē? ⁵ Ē akai keskafakī Pedrori Jesúsnoa yoifofāsafamis. A Jesús nīchiafāfe fetsafāferi Jesúsnoa ato yoifofāsafamisfo. Jesús āfe extofāferi ato yoifofāsafamisfo. Nāfo kēro Jesús Ifofafo fe fianākaxō Jesúsnoa ato yoifofāsafaifono āto āfifori ato fe fofāsamisfo. ¿Nāfāfe āto āfifāfe

Jesús Ifofafo fe fianāfo keskari ěri nā kĕro Jesús chanĩmara faa fe ě fianātiromamĕ eferi kafāsanō? ⁶ ¿Afeskakĩ ě Bernabé feta nō mato Jesúsnoa yoifikĩ nō yonoimĕ, a nō yopai yafi a nō piai fixikĩ? Akka fetsafāfe Jesúsnoa mato yoifikakĩ yonokanima nō akai keskafakĩ. Akka afara yopaifono mā ato ināmis. Akka a nō yopai kaxpa nō fimisma, yonoxō nō fimis. ⁷ Anā meka fetsari ě mato yoinō. Sorarofāfe kaxpa yonokanima. Āto xanĩfāfe a piaifo ato inākani. Askatari ato kori inākani. Nāskarifikĩ yora tare fanamisto āfe tare foaisharano āfe yono pitiro. Askatari fakka kexemistori āfe fakka chocho fīaxō ayatiro. Nāskarari a Jesúsnoa yoimisfāfe a piaifo fitirofo pixikakĩ tsōa kopifaxoma.

⁸ Nā ě mato yoiai keskara yōra mekama. Akka Moisés nānori kirika keneyoni Niospa meka yoikĩ. ⁹⁻¹⁰ Moisés Niospa meka kenekĩ iskafani: “Nā fakka keskara nexakaxō xiki peama peama amamisfo āfe xaka potaxikakĩ. Nāskakĕ ifāfe renextiroma xiki xaka pinō ifomāi yonoxokĩ,” ixō Moisés Niospa meka yoikĩ kirika kenei. Akka fakkaōnoa Niospa yoinima. Yorafoōnoari yoini. Nā Jesús yonoxomisfoōnoa yoini. Nāskaxō afaa kopifaxoma fitirofo yopaifo Niosnoa ato yoikakĩ. Askatari fetsafāfe tare kexexō shinātirofo iskakakĩ: “Ē na tare kexeakĩ nāskakĕ ě tarepanoa afama mīshti fipa,” ixō shinātirofo. Nāskarifikĩ a Niospa meka ato yoimisfāfe a piai fitirofo. ¹¹ Nāskarifikĩ nokori kopikiri a nō yopai mā noko kaxpa inātiro afaa kopi yōkaxoma. ¹² Fetsafāfe Jesúsnoa mato yoiaifono nikakĩ nā yopaifo mā ato ināmis.

Akka nō mato taefakĩ yoiyoni. Nāskakĕ mā noko afama mīshti inātiro fetsafo finōmainĩfofā. Mā noko

afama mīshti ināfitirokē nō mato afaa yōkamisma. Nāskaxō nō tenemis. “Nō ato kori yōkaito anā noko nikapaitirofoma,” ixō nō shināmis. Nāskakē nō mato afaa yōkapaimisma. ¹³ ¿Mā tāpiamamē? Nōko kaifo judeofo na Nios kīfiti pexefā mēra femisfo a piaifo. Nā piaifo Nios ināxikakī. Nāskakē a Nios kīfiti pexefā mēra yonomisfāfe a piiai kaxpa pim-isfo tsōa kopifaxoma. ¹⁴ Nāskarifikī nōko Ifāfe yoini iskafakī: “Fētsa ēfe meka shara fetsafo yoiaito nikakakī nā nikaiāfāfe a yopaifo ato inātirofo,” ixō nōko Ifāfe yoini. ¹⁵ Nānori nōko Ifāfe yoifinikē ē mato afaa pishta yōkamisma. Mato Niospa meka yoifikī ē mato kirika kene fomaima: “Ea kori inānōfora,” ixō. Nāskakē tsōa ea yoikī iskafatiroma: “Pablo ato kori fīapaikī ato Jesucristoōnoa yoimis,” ixokai tsōa eōnoa anori yoitiroma. “Akka Pablo ato kori fīamiski ato Jesucristoōnoa yoikī,” ea mā faito ē rāfipaitiro. Nāskaxō ē mato afaa pishta yōkamisma: “Pablo kori fia,” mā ea fanōma. ¹⁶ “Ē mato afaa yōkatama Jesúsnoa ē mato yoimis. Nāskakē ē sharafinakōiakī,” ixokai ē yoitiroma kakapaiyanā. Akka Niospa ea katoxō ea nīchini ē Jesúsōnoa ē yoifafāinō. Akka ē Jesúsōnoa yoiyamaito Niospa ea omiskōimatiro. ¹⁷ Ē yoikī iskafamis: “Epa Niosi, mī Fakeōnoa ē yoipai,” ixō ē yoikē Epa Niospa ea afara inātiro. Akka ēa ē yoima. Niospa ea nīchini Jesúsnoa ē ato yoinō. Nāskakē nā ea yoini keskara ē ato yoimis. ¹⁸ Akka ē Niospa meka shara yoimiskē, ¿afaa ea Niospa ināimē? Ato Niospa meka yoixokai ē afaa ato yōkamisma. Askaxorikai ē ato yoimisma iskafakī: “Niospa mato yoikē Jesúsnoa ē mato yoifafainaito a ē yopai ea inānōfora,” ixokai ē ato

yoimisma. Akka ã Niospa meka ato yoipai afaa yõkaxoma. Nãskax ã inimasharakõi Epa Niospa ea inimamaino.

¹⁹ Ëkai tsõa yonomatima. Nãskafiax ãakõi ã mãto yonomati keskarakõi. Nãskakẽ keyokõi yorafo ã axosharapai ato Jesús chanĩmara famaxikĩ. Nãskax ã yorafãfe ãto yonomati keskaraki. Akka nã Nios Ifofaafoma ã ato fe rafemis ãto feyafati shara keskara ixõ ã ato yoiaito, Jesús Ifofanõfo ã Niospa meka yoiaito. ²⁰ Ëfe kaifo judeofo fe ã ikax nã ikaifo keskari ãri ato keskara ipai. Ë ato keskara ikaito ea õikakĩ Jesús chanĩmara fatirofo. Nõko xini Moisés nõko kaifo yoipaoni keskarakai iskaratĩa anã ã nikaima. Akka ã nikayamafikĩ a Moisés yoipaoni keskara nikamisfo fe ãri ato fe ixõ Moisés yoini keskara ãri askai ato Jesús chanĩmara famaxikĩ. ²¹ Nãskakẽri nã Moisés yoini keskara nikaifoma fe ã ato fe ixõ nã Moisés yoini keskara ã akima ato Jesús chanĩmara famaxikĩ. Ë nãskafafiamiskẽ Cristo ea yoini keskara ã amis. Ë nikasharaxõ nã fisti ã kachikiri fatiroma. ²² Jesús chanĩmara faafãfe ranãrito Niospa meka tãpisharayokanima. Ë nã keskarafo fe ikax ãri ã ato keskara ipai eari Jesús tãpimasharanõ. Nã ea tãpimana keskara ãri ato tãpimasharanõ. Nãskatari fatora fetsafo fe ã ikax ã ato keskarari ã ipai. Eõxõ Jesús chanĩmara fakanax afe isharapakexanõfo. ²³ Nãskakẽ ã askafakĩ ã ato Jesucristoõnoa tãpimasharai nã chanĩmara faifono ãri ato fe inimai finakõitiro.

²⁴⁻²⁵ Akka mã mã tãpia nã naetapafo xonõnõnãxikakĩ ichotirofo yora ichapafãfe ato

ōiaifono. Akka nã koshi fistichi ato xonōtiro. Nãskakē akiki xanīfo inimakī afara shara fetsa inātiro. Nãskakē kerexkai ichotirofo fetsafo xonōpaikani. Akka ichoyokanaxma tae fenai ichoyofofāfōfāitirofo feyafaxikakī xokenāxikakima. Nãskarifikā nōko Ifo Jesús kerexkai yonosharaxokāfe afara chakafo fayamaxikakī. Akka Niospa mato yoiaito nikakī akāfe Jesús feyafaxō Ifofaxikakī mā akiki nokoaitīa mato afara shara inānō. Akka nã ichokī ato xonōa xanīfāfe afara shara inā keyotiro. Akka Niospa noko afara inā keyonakama. ²⁶ Nãskakē ē Jesús fisti yonoxoni afaa fetsa shinātama. Akka ēa ē kaxpa mato yoimisma. Niospa ea shināmanaino ē mato yoimis. Naetapafo xonōnōnāpaikani mēstekōi ichotirofo. Nãskarari ē mēstekōi ika. Ēfe Ifāfe ea yoiai keskarakōi ē iki akiki nokosharaxiki. ²⁷ Ēa ē apaiyai keskara ē akima. Ēfe Ifāfe ea amapaiyai keskara ē aki. Ē tenepaifikī ē tenetiroma Jesús Ifofasharaxikī. Ē xokenāfiakī ē tenetiroma Jesúsnoa yoikī. Jesús fistichi ea yonomatiro. Nãskakē ē fetsafori yoifafāini Jesús Ifofaxō yonosharaxonōfo. Nãskakē Niospa ea yoia keskara ē ayamax ē fenotiro, afianā ē Nios yonoxotiroma. Niospa anā ea yonomatiroma. Ē fenopaima. Nãskakē nã ēa ē apaiyai keskara ē akima. Ēfe Ifāfe ea amapaiyai keskara, nã fisti ē aki.

10

Judeofāfe Nios chakafapaoni keskara iyamakāfe

¹ Efe yora mīshtichi, tāpikāfe. Nōko xinifo Egipto anoax fonifo. Akka Niospa nai kōi nāmā pishta ato

fotomaxoni a õiax nõko kaifo judeofo acho fonifo. Niospa nã nai kõiõxõ ato iyopaiyai ari ato iyoní. Ato iyoikaino nã ãamãfã ãfe ane Õshi ano nokonifo. Nãnoxõ nõko kaifo judeofo Niospa ato ãamãfã nẽxpakãa rafe ato paxkaxotani anori pokefainõfo. ² Moisés ato rekẽ tanaxoni. Akka nõko kaifo judeofo Moisés acho fonifo. Nã Moisés chanĩmara fakanax afe rafepaonifo. Nãskakẽ nai kõi nãmã pishta kaino Moisés nãmã ato iyoní. ãamãfã pokeifokani mã ãamãfã nakirafekõi shinãtanano. Nãskakẽ pokefainifo ãamãfã nẽxpakãa. Mã ãfe kaifo ato ififani Moisés kani. ³ Askatari Niospa nai mẽraxõ a piaifo ato potaxoni fikaxõ pinõfo. ⁴ Nãskatari ano fakamano Moisés tokirinĩfã ãfe mẽstetiniĩ ramãino faka sharakõi tsekeni keyokõichi ayanõfo. Cristoõnoax faka sharakõi tsekeni judeofãfe ayanõfo. Akka fakirira fofãfofãipaonifo Cristo ato fe kaino, tsõa Cristo õinima. ato fe kakĩ ato axopaoni ato kexexõ. ⁵ Askafafiaifono Epa Nioskai atoki inimania ãfe meka nikayamafono. Nãskakanax tsõa istoma anoax fofãfofãikani nikayospakanax nai keyonifo. Nã tsõa istoma ano ato maifakĩ fetsanifo Niospa ato namakĩ keyoano.

⁶ Akka afãfe afara chakafapaonifo. Nãskakẽ atoõnoa noko tãpimani afara chakafo fapaonifo keskara nõri ayamanõ inifo keskai omiskõixikima. ⁷ Afãfe afara chakafapaonifo keskara ayamakãfe. Akka nãfãfe afara fetsa onifakaxõ, “Na nõko niosra,” fapaonifo. Nãskakaxõ kĩfipaonifo. Kĩfikaxõ ãfe ferotaifi piyanã ayata ikaxõ afara fetsafo chakafapaonifo. Pãeyanã monopaonifo. “Nõko nios nokoki inimaira,” ikanax askapaonifo. Nãskakẽ mãri ato keskara iyamakãfe. ⁸ Nãskakanax

ãto ãfima fe ipaonifo. Askatari kērofori ãto fenemafo fe ipaonifo. Askaiãfe òikĩ Niospa veintitrés mil yorafo ato namarisafatani nã pena fisti. ⁹ Mãri ato keskara chaka iyamakãfe. Akka, “Nioskai nokoki fena òitifishkiyotiroma. Nãskakē ã afara chakafaiãto ea Niospa omiskõïmanima,” ixõ shinãyamakãfe. Akka nõko xinifãfe chakafaiãfe òikĩ anã teneyamakaikĩ Niospa ato omiskõïmani. Nãskakē ato mēra rono paekõïfo nĩchini ato chachinõfo. Ato chachiano ranãri nanifo. Nãskakē noko tãpimai nõri Nios chakafaito nokori omiskõïmatiro. ¹⁰ Askatari mēxotaima mekaifãfe òikĩ Niospa ãfe ãjirinĩ ranãri ato namani. Akka mãri ato keskara iyamakãfe mato omiskõïmayamanõ.

¹¹ Nã nõko xinifãfe afara chakafapaonifoõnoa noko kenexonifo noko yoisharanõ nõri ato keskara iyamanõ omiskõïxikima. Akka nõko Ifo Jesús oyoamano chaima nõ itipinĩsharayoi mã nõko Ifo nokoaino anã nõ keskara chaka nõ ixikima. ¹² Akka fētsa shinãkĩ iskafai: “Èkai ato keskarama. È afaa chakafatiroma. Akka afara sharafo fisti ã amis,” ixõ anori shinãtiro. Nãskakē kexemesharakãfe ato keskara iyamaxikakĩ afara chakafai. Akka mãri Jesús Ifofasharamax mã ato keskarari mã itiro afara chakafai. ¹³ Satanás mato afara chakafamapaikĩ mato fisti chakafamapaimisma. Keyokõï nã Nios Ifofaãfori ato chakafamapaimis. Mato chakafamapaifiaino Niospa mato yoia keskara mato kexesharatiro mã afaa chakafanõma. Akka mato yoimis keskara mato axõï mã chanĩmarã faito. Nãskakē Niospa Satanás mato ichapama fekaxtefatimafai mã chakafanõma. Mato Niospa amatiro mã tenenõ mato fekaxtefafiaino. Mãto òiti mato

kerexfaxotiro mā Satanás nikanōma. Askatari afara afe keskararafāfe mato fekaxtefaino Niospa mato amatiro mā tenenō mā Nios kachikirifaxikima.

¹⁴ Efe yora mīshtichi, fetsafāfe afara onifakaxō, “Na nōko niosra,” ikaxō chanīmara faifono ato makinoax paxkafaitakāfe. ¹⁵ Nāskakē shināsharakōikāfe nā ē mato yoiai keskara ōitsai ē mato pārairaka. Akka ea yoikāfe ē mato pāraimākai. ¹⁶ Mā mā tāpia Niospa meka nikai nō ano fisti ichanāmis. Nāskaxō nō fimi ene ayamis Jesús noko nāxoni shināyanā. Nā nō ayamis, “Fimi ene Jesús āfe imira,” ixō nō shināmis. Nāskaxō nō shinātiro Jesús noko naxōi āfe imi foni nō afe nīpaxanō. Nāskakē nō yoitiro iskafakī: “Aicho Epa Niosi, mī Fāke noko nāxoni nō afe īpaxanō,” ixō nō yoitiro. Nāskatari pāa torepakexō Jesús noko nāxoni shinākī nō pimis. “Nā pāa Jesús āfe namira,” ixō nō shināmis. Nāskaxō nō shinātiro Jesucristo noko omiskōixoni mastafono ifi cruz ikakinoax. Nāskakē nō afe rafepakenaka Ifofaax. ¹⁷ Akka pāa fisti torepakexō keyokōichi nō pimis. Nāskarifikī Jesucristo fisti keyokōichi nō chanīmara faax fisti keskara nō ixii.

¹⁸ Nāskatari nōko kaifo israelifo shinākāfe. Nāfāfe āto inafō retekaxō Nios ināmisfo āto chaka soapaikakī. Nāskatari nā israelifāfe Nios kīfiti pexefā mēraxō Nios yonoxomisfāfe nā nami pimisfo. Nāskakanax nā fisti keskara imisfo ano fisti ichanānākaxō pikani Nios shināyanā. ¹⁹ Nāskakē ē mato yoi nā afara fetsa onifafo akai afama. Askatari afara fetsa onifakaxō nami ināfo nā namikai afama a onifafokairoko Nioskōikē. ²⁰ Akka nā Jesús Ifofaafāfema Nioskōi

nami inātamaroko afara fetsa onifakaxō, “Nā nōko niosra,” ikaxō niafaka chaka nami ināmisfo. Nāskakē mări nami ināyamakāfe. Niafaka chaka fe mā rafeaito ē mato ōipaima. ²¹ Mā nōko Ifo Jesús fe rafepai a niafaka chakafo fe rafeyamakāfe. Askaxō nā rafe mā ifofatiromaki. Nā Jesús Ifofafo fe mā ato fe ichanākaxō pāa torexō mā ato feta pimis Jesús noko nāxoni shināyanā. Nāskakē nā Jesús Ifofaafoma fe ato fe mā ichanātiroma niafaka chakafo nikaxikīma. ²² Nōko Ifo Jesús fe rafepaikī nō niafaka chaka fe rafepaikī nō nōko Ifo Jesús nō ōitifishkimatiro. Nō askafaito noko omiskōimatiro. Akka, ĩnō Jesús kerexkai finōtiromē noko omiskōimayamanō? Maa, nō Jesús finōtiroma. Jesús noko omiskōimanaito tsōa noko timamatiroma.

Nā Jesús Ifofafo nō ato noikōixō nō ato shināchakamatiroma

²³ Akka mā shināiraka iskafakī: “Cristo ēfe Ifo. Nāskakē nā ē apaiyai keskara ē atiro, afaa chakama,” ixō mā shināiraka. Ēje, nānorikōi mā shināmis. Nāskakē afara shara shinākī: “Nā chakama nō atiro,” ixō mā shināfiaino akka fetsafāfe anori shinākanima: “Chakara,” famisfo. Nāskakē fētsa ferotaifi nō afara pitiroma ato shināchakayamaxikī. Chanīma, nō Jesús Ifofaxō Niospa noko yoini keskara keyokōi nō pitiro. Keyokōi nami shara nō pitiro. Chanīmakōifiano, Jesús Ifofaa fetsafāfe shināmisfo iskafakakī: “Ē nami pitiroma. Ē nami pixō ē Jesús chakafatiro,” ixō shinātirofo. Nāskakē nō ato ferotaifi nō nami pitiroma shināchakanōfoma. Akka nō ato shināchakamatama Jesús fisti nō ato

shinãmapai. ²⁴ Nãskakẽ nã mã apaiyai keskara fisti shinãyamakãfe. Fetsafoõnoari shinãkãfe. Ato axosharakãfe.

²⁵ Fatora fẽtsa mato nami inãpai mato kori fĩaxikĩ akka pipaikĩ mã fitiro pixikĩ. “¿Fanĩa mĩ na nami feamẽ?” ixõ yõkayamakãfe mã pixõ shinãchakaxikakĩma: “Nã nami nã mĩ niosnãraka,” ixõ yõkayamakãfe. Akka noko Niospa yoini iskafakĩ: “Keyokõi mã nami pitiro,” ixõ noko yoini. ²⁶ Nõko Ifãfe keyokõi onifani. Keyokõiri ãfenã. Nã onifani tii noko inãpai nõkonã keyokõi inõ.

²⁷ Akka nã Jesús chanĩmara famato mato pimapaiyaito mã a feta pipaiyai afeta pikãfe. Nãskaxõ iskafakĩ yõkayamakãfe: “¿Fanĩa na nami mĩ feamẽ? Nã mĩ niosnãraka,” ixõ yõkayamakãfe. Yõkaxoma mã pitiro shinãchakaxikima. ²⁸⁻²⁹ Askatari fẽtsa mato yoikĩ iskafatiro: “Ë mato nami pimai nã ãfe niosnã,” ixõ mato yoiaito nã nami piyamakãfe. Akka mã piaito õikĩ ãfe shinã mẽraxõ shinãtiro iskafakĩ: “Ajaa, na feronãfãke Jesús Ifofafioxõ nã ãfe niosnã mã nami pii. Na feronãfãkekai Jesús Ifofasharama,” ixõ ãfe shinã mẽraxõ shinãtiro. Nãskakẽ mãri mã nami pixõ mãto shinã mẽraxõ mã shinãchakatiro: “Mã nõ chakafara,” ixõ. Akka mã mã tãpia keyokõi nõ nami pitiro. Nãskakẽ fet-safãfe tãpamano ato ferotaifi nã nami piyamakãfe shinãchakayamanõfo. ³⁰ Mã yoiraka iskafakĩ: “Ë keyokõi nami pikĩ ã Nios, ‘Aichora,’ fafafaãini. ¿Akka afeskakĩ fẽtsa eõnoa shinãchakatiromẽ?” ixõ mã shinãiraka.

³¹ Ë mato yoinõ afara mã akai shara shinãkĩ akãfe. Niospa mato shara õinõ akãfe. Niosnoa

shināsharanōfo akāfe. ³² Nā mā akai keskafakī fetsafo shināchakamayamakāfe. Nōko kaifo judeofo iyamai mani fetsafo Nios Ifofaafoya ato shināchakamayamakāfe matoōxō nōko Ifoōnoa shināchakanōfoma. ³³ Nāskari fakī ēri keyokōi yorafo ē ato shara faxopai inimanōfo. Akka nā ē apaiyai keskara fisti ē akima. Fetsafāfe afara apaiyaifo keskafakī ē ato axopai Jesucristo Ifofakaxō ato chaka xatekanax afe ĩpaxanōfo.

11

¹ Akka na Cristo akai keskara ēri aki. Akka māri nā ē akai keskara akāfe.

Ichanāxō nō Nios shināino feronāfake fe kēro afeskax itirofomāki Pablo ato yoini

² Mā ea shināmiskē ē mato aicho fai matoki inimakī. Nā ē mato yoimis keskara mā nō feyafamiski. Nā mā nikafafāini. ³ Efe yora mīshtichi, ē afara ē mato yoipai mā tāpinō. Cristofi keyokōichi nōko Ifokī. Nāskarari kērofāfe āto ifo āto fenefo. Akka Cristo āfe Ifokī Epa Nios. ⁴ Nāskakaxō feronāfake Nios yoiti pexe anoxō yoivanā kīfikani marakometirofoma Cristo shinākani. Nō marakomexō nōko Ifo nō noima. Nāskakē nōko Ifo nō rāfimatiro. ⁵ Askatari kērofāfe Nios kīfipaiyanā Niospa meka yoipaikani marakometirofo fetsafāfe tāpinōfo āto fenefo āto ifokē. Nāskara mā nō feyafamis. Āto marakometimaisax maxko ika keskara itirofo. Nāskaxō āto fenefo rāfimatirofo. ⁶ Akka kērofāfe Nios kīfipaikani marakomekaspakani feronāfakefo keskara maxko itiro. Nāskakanax kērofo maxko ikanax rāfipaitirofo. Nāskakē ato iskafatirofo: “Nā kērofo chakafora,”

ikaxõ yoitirofo. Nāskakē kērofāfe Nios kīfipaiyanā āfe mekari yoipaikani marakometirofo. ⁷ Akka feronāfakefāfe Nios kīfipaikani askayamai āfe meka yoipai marakometirofoma Nios keskara sharamāi ikanax. Askatari Nios nikakōikanax āfe ōiti keskara shara ikafo. Nāskafakīri kērofāfe āto fene nikakōikanax shara itirofo. Nāskakē āto fenefo atoki inimatirofo. ⁸⁻⁹ Niospa feronāfake onifakī taefani. Chipo xotofake onifani. Feronāfakeōnoa Niospa xotofake onifani. Kēronoakai Niospa feronāfake onifanima. Akka feronāfakeōnoa xotofake Niospa onifani fene afara axosharanō. ¹⁰ Nāskakē feronāfake kēro īkitiro. Kērofāferi āto fene nikakōitirofo. Nāskax Nios Ifofaafō ichanāifono kērofāfe āto marakometi maitirofo āto fenefo nikakōikaxõ fetsafāfe ato ōinōfo āto fenefo nikakōiaifono. Askafono Niospa āfe ājirifāfe ato ōikakī yoitirofo iskafakakī: “Niospa yoini keskara na kērofāfe āto fenefo nikakōisharakani,” ixõ yoitirofo. ¹¹ Nāskax nōko Ifo fe nō rafeax feronāfakefo fe xotofakefo nō axõ faatanāsharatirofo. Akka xotofakefo iskatirofoma: “Nō feronāfakefo nō yopaima,” itirofoma. Askatari feronāfakefo iskatirofoma: “Nō xotofakefo nō yopaima,” itirofoma. ¹² Niospa taefakī feronāfake onifani, āfe ane Adán. Nāskaxõ xotofakeri onifani, āfe ane Eva. Adán āfe pishi tsēkaxõ Niospa onifani. Nāskatari xotofake fake feronāfake kāipakemis. Akka xotofakefoya feronāfakefo Niospa onifani.

¹³ Efe yora mīshtichi, shinākāpo. Xotofakefāfe mato fe ichanākaxõ Nios kīfipaikakī marakomex-oma Nios kīfikī, ¿askara sharamamē? Mā ea yoitiro. ¹⁴ Mā mā tāpia feronāfake foo chainipaya nō shara ōitiroma. Akka nōkai askara feyafamisma. Nāskakē

feronãfãke foo chainipa fatiroma. Foo chaini-payax rãfitiro. ¹⁵ Akka xotofakefãfe ãto foo chai faafo nã marakometi shara õitsa itirofo. ¹⁶ Akka na ã mato yoiai keskara ea nikakaspai fetsa efe feratenãito ã afaa yoipaima. Akka nã fisti ã mato yoimis. Xotofakefo marakometiro ã mato yoimis. Nã ã mato yoimis keskarari Nios Ifofaa fetsafãfe nãnorikõiri yoimisfo nã ichanãifotã.

Nios yoiti pexe anoax ichanãkaxõ Corinto anoafãfe afarafo chakafaifono Pablo ato yoini anã askanõfoma

¹⁷ Akka afara fetsari ã mato yoipai. Mẽ nika Nios yoiti pexe anoax ichanãxõ mã afara chakafaito. Nãskaxõ afara shara fatama mã afara chakafakõini. Nãskakẽ, sharafora ã mato faima. ¹⁸ Akka mẽ nika mato anoax fẽkaxõ ea yoiaifono nã mã ichanãitã fetsafo fe mã osinãxma ato fe ichanãkaspaito. Nãskax mã ato ketaxamei tsaopaitiroma. Mã ichanãxõ nã nõko Ifo Jesús mato nãxoni shinãpaifi mã ranã mã noikaspa faatanãi. Nã ã matoõnoa nikai keskara ã chanãmara fai rakikã. ¹⁹ A mã shinãi fisti anori mã shinãima. Nãskarafo yorafo a shinãi fisti anori shinãkanima. Nãskakẽ mã ranã feratenãkakĩma yoinãnãsharakãfe tãpisharaxikakĩ. Fetsafãfe anori mã shinãino, nãskakẽ fetsafãferi anorima shinãi. Nãskakẽ yoinãsharakãfe fato sharamãkĩ. ²⁰ Ë anã mato yoisharapai. Mã Nios yoiti pexe anoax ichanãxokai mã pãa piyanã ayayanã a noko Jesús nãxoni mã shinãima. Askatamaroko mã piyai yafi a mã ayai fisti mã shinãmis. ²¹ Mẽ nika a mã piyai mã feito mares pixikĩ ichanãxõ ato manayoxoma. A fonãikaifokai mã ato inãima. Nãskakẽ fonãikani.

Askatari mā pāemis. Askarakai sharama. ²² Akka pipaikī ichanāti pexe ano kayoxoma ĩkisi mātō pexe anoxō piyokāfe. Akka mātō pexe anoxō piyoxomaroko nā Nios yoiti pexe ano mā femis anoxō mares pixikī a fonāikaifo ato akīxikima. Nāskakē a fonāikaifo rāfitirofo. Mā askafakī a mato fe ichanāfo mā chakafai. Mā ato noima. Ķē matoōnoa yoisharaimē? Maa. Ĕkai matoōnoa yoisharaima māmāi ato chakafaito.

*Jesús noko nāxoni shināyanā nō piyanā nō ayatiro
(Mt. 26.26-29; Mr. 14.22-25; Lc. 22.14-20)*

²³⁻²⁴ Nāskakē nōko Ifo Jesús ea yoini keskara ē anā mato yoini. Ea tāpimani keskara ěri mato tāpimapai. Nōko Ifo Jesús Judaspa ato achimayoamano nā fakish fisti aōxō tāpimisfo fe ichanāyoni. Nāskaxō ato feta pikī pāa tsomaxō Apa Nios yoini iskafakī: “Epa Niospa, mī sharafinakōia. Mīfi keyokōi tāpiaki. Aicho,” fata pāa torepakexō ato tii ināni. Nāskaxō ato anā yoini iskafakī: “Na pāafi ěfe yoraki. Ĕfi matoōnoax chipo naikai mato noikōiax. Mē naano nā mā ichanāitīa nā mā pāa piatīa ea shināfafāikāfe,” ixō ato yoini. ²⁵ Nāskaxō mā piaifono anā kecho tsomaxō ato yoini iskafakī ato ayamayanā: “Afara fena shara ē mato yoinō. Nā mā ayai ěfe imi. Nāskakē mā ea shinātiro. Ĕfe imi foyanā ē matoōnoax nai mā efe Epa Nios ari ĩpaxanō. Nā nō akai keskara chipo akāfe mē naano nā mā ichanāitīa ea shinākī,” ixō ato Jesús yoini. ²⁶ Nāskakē nā mā ichanāitīa pāa piyanā ayayanā Jesús shināfafāikāfe: “Nōko Ifāfe noko nāxoni,” shināyanā. “Nā pāa Jesús āfe yora,” ixō shināfafāikāfe pāa piyanā. Jesús anā oaitīa nā

chanĩmara faifo askapakexanõfo. Ë anã oaitĩa nãskaras akãfe.

Ichanãifo anoxõ pãa pikĩ nõ Jesús shinãtiro

²⁷ Nãskakẽ nã mã ichanãĩ anoxõ mã pãa piyanã ayayanã mã Jesús shinãtiro. Askafafiakĩkai mato chaka xatekaspaxõ mãri mã chakafai pãa pixõ. Akka nõko Ifãfe noko nãxoni ãfe yora omiskõiyanaã ãfe imi foyanaã noko nãxoni. Nãskakẽ nõ ichanãĩ anoxõ pãa piyanã ayayanã nõko Ifoõnoa shinãkima nõ nõko Ifo nõ chakafai. ²⁸⁻³² Nãskakẽ nõ ichanãyanã nõ pãa piyanã nõ ayatiro nõko Ifo shinãyanã. Akka taefakĩ nõ shinãtiro iskafakĩ: “Ë afara chakafamis,” ixõ nõ shinãtiro. Akka nõ afara chakafafxõ Epa Nios nõ yõkayotiro nõko chaka noko soaxonõ. Nãskaxõ Jesús noko nãxoni nõ shinãkõitiro pãa piyanã. Akka nõ askafayamaito Epa Niospa noko omiskõimani. Akka nã ã mato yoiai keskara atiri mã askaima. Nãskakẽ mã iramanai. Ranãri mã isinĩ iki. Nãskatari ranãri mã mã nai. Nãskakẽ nã mã ichanãitĩa pãa piyoxoma afara chakafxõ ikisi Epa Nios yoiyokãfe mato chaka soaxonõ matori omiskõimayamanõ. Akka noko omiskõimafiakĩ a Jesús Ifofaafoma Niospa ato omiskõimanai keskafakĩ noko omiskõimasharaima. Akka afokai ãfe fakefoma. Nãskaxõ omiskõipakenakafo mẽra ato potaxii. Akka nõfi ãfe fakekõifokĩ. Nõko Ifãfe noko omiskõimafiakĩ a omiskõipakenakafo mẽra noko potatamaroko noko omiskõimakĩ noko tãpimani nõ anã chakafanõma.

³³ Akka mã ichanãxõ pãa pixikĩ ranãrito mã taefakĩ piimis. Nãskakẽ fetsafãfe akairi pipaikani afaa pitirofoma. Akka piyoxoma ato manayokãfe

fetsafo feta pixikakĩ. Nãskakẽ mã ato manayotiro keyokõichi pitirofo. ³⁴ Akka fatora fetsa mã fonãiki ichanãyoxoma mãto pexe anoxõ mã piyotiro. Nãskaxõ mã ichanãxõ mã ichapa piyaino fetsafãferi pitirofo. Nãskaxõ mã ichanãxõ Jesús shinãkĩ ato feta mã pisharaino Niospa mato omiskõïmanima. Afara ichapakõï ã mato yoipai. Nãskaxõ ã matoki nokoxõ atoõnoa ã mato yoisharapai.

12

Jesús Ifofaafãfe Niospa Yõshi Sharaõxõ afarafõ atirofo fetsafo fe axõ faatanãsharaxikaki

¹ Efe yora mĩshtichi, afara fetsa anã ã mato yoisharapai. Niospa Yõshi Sharaõxõ afarafõ nõ atiroõnoa ã mato tãpimapai aõnoa mã tãpisharakõinõ. ² Shinãkapo. Mã Jesús Ifofaamano afara fetsa onifakaxõ, “Na nõko niosra,” ikaxõ mato chanĩmara famapaonifo. Mã chanĩmara fafiaino a onifafotokai afaa shinãtirofoma. Askaxorikai afaa pishta mato yoitiroma. Nãskakẽ mã anorima shinãyopaoni. ³ Askata yora fetsafãfe matoki nokoxõ yoitirofo iskafakakĩ: “Ë mato Niospa meka yoinõ. Niospa Yõshi Sharaõxõ ã mato yoi,” ixõ mato yoiaito, ¿afeskaxõ mã tãpitiromẽ Niospa Yõshi Sharaõxõ mato yoimãkĩ? Ë mato tãpimanõ afeskaxõ mã tãpitiromãkĩ. Fatora yora fetsa Jesús mekakakĩ chakafai, akai Niospa Yõshi Sharaõnoax mekaima. Akka, “Jesúsfi nõko Ifokĩ,” ixõ yoi Niospa ãfe Yõshi Sharaõxõ yoitiro.

⁴ Nã nõ Epa Nios Ifofa tii ãfe Yõshi Sharapa noko amapayai keskara noko amai. Ares fisti

noko shināmatiro aōxō nā Nios Ifofafo fetsafo nō ato asharaxonō. ⁵ Aōxō fetsa fetsafakī afo akī nōko Ifo nō axotiro. Nā keyokōi Nios chanīmara faifo tii nōko Ifo fisti. ⁶ Nāskakē Niospa nā nō Ifofa tii noko shināmani aōxō nō fetsafo afara axosharanō. Askatari Niospa keyokōi noko tāpimani a noko axopaiyai keskara noko axōi. Nā nōko Nios fisti anā ano fetsama. ⁷ Askatari nō Nios Ifofaito noko tāpimani āfe Yōshi Shara nofe iki. Nofe ixō noko amatiro nā Nios Ifofaifo nō ato axosharanō. ⁸ Fetsafāfe Niospa Yōshi Sharaōxō mēstesharakōi noko yoitiro. Askatari fetsafāfe Niospa Yōshi Sharaōxō tāpisharakōikī noko tāpimasharatiro. ⁹ Askatari fetsafori Niospa Yōshi Shara fistiōxō Nios chanīmara fakanax finakōia ikafo. Askatari fetsafāferi Niospa Yōshi Sharaōxō yorafo sharafakani. ¹⁰ Askatari fetsafāferi Niospa Yōshi Shara fistiōxō tsōa atiroma keskara faino, fetsafāferi Niospa Yōshi Sharaōxō nā Niospa yoiyai keskara noko yoiiaifono, fetsafāferi Niospa Yōshi Sharaōxō tāpitiro fētsa niafaka chakaōxō yoimākai askayamai Niospa Yōshi Sharaōxō yoimākai. Askatari fetsafāferi Niospa Yōshi Sharaōxō meka fetsa nikayomisma yoitiro. Askatari fetsafāfe meka fetsafāfe noko yoiaito nikafikī nō tāpiyamaito fetsafāferi Niospa Yōshi Sharaōxō noko yoisharatiro tāpinōfo. ¹¹ Nā nō Nios Ifofatifi Niospa Yōshi Shara fistichi noko amapaiyai keskara nō atiro. Nā noko amapaiyai keskara noko amatiro.

Nōfi yora fisti keskaraki

¹² Nōko yora fistifiano nō pōyayai fetsea. Askata nō feroyata, pachoyata nā nō fisti askai fet-

sea. Nāskarifiāi nō keyokōichi Cristo Ifofaano nā fisti keskarakōi. ¹³ Cristo fistifiano nōfi āfe pōya keskarakī. Atiri nō judeofo ikaino mani fetsafori judeofoma ikaino yorafāfe āto yonomatifo ikaino askatari yorafāfe āto yonomatifoma ikaino nō askai fetsea. Nā nō Cristo chanīmara faafo tii nō afe yora ika. Niospa Yōshi Sharapa noko ōiti fetsafaax nō mēra iki.

¹⁴ Nōko yora fistifiano nō pōyayai fetsea. ¹⁵ Nāskakē nōko tāekai yoikī iskafatiroma: “Ēkai mēkema. Nāskakē ēkai āfe afaama,” ixō yoifi nā nōko tāeri nōko yoraō nea. ¹⁶ Nāskatari nōko pachori yoikī iskafatiroma: “Ēkai feroma. Nāskakē ēkai āfe afaama,” ixō yoifi nā nōko pachori nōko yoraō nea. ¹⁷ Akka nōko yora nōko fero fistikē afeskaxō nō nikakeranama. Nāskatari nōko yora nōko pacho fistikē afeskaxori nō xetekeranama. ¹⁸ Akka Niospakai askara noko onifanima. Nā apaiyai keskara fakī noko onifani. Mapoya fāta feroya fāta pōyaya fāta pachoya fata kishiya fāta noko fani. ¹⁹ Akka nōko yora afara fistiya ikanokai shara ikeranama. ²⁰ Akka nōko yora fistifiano nō pōyayai fetsea.

²¹ Nāskakē nōko fērokai mēke yoikī iskafatiroma: “Ē mia yopaima,” ixō yoitiroma. Māporikai tae yoikī iskafatiroma: “Ēkai mia yopaima,” ixokai yoitiroma. Nāskafakīri a Nios Ifofaa fetsafo iskafakī yoiyamakāfe: “Ē mia yopaima,” ixō yoiyamakāfe. Niospa nā Ifofaafō tii noko noikōia. Nāskakēri nōa ranā noinākāfe. ²² Nōko yora āfe afara fetsafo mitsisipayamafekē nāfori nō yopakōi. ²³ Nōko yora āfe afara fetsafo, sharamara,

nō fafiakī nāfori nō kexesharai. Nōko afara fetsafori nō onesharatiro nō rāfixikīma. ²⁴ Akka nōko yora āfe afara fetsa sharano nō onetiroma. Niospa noko yora onifaxoni nō kexesharanō. Nāskaxō nō yoitiro iskafakī: “Ēfe afara ě yopakōi,” ixō nō yoitiro. Nāskafakiri fētsa a Nios Ifofaa fetsa yoikī iskafatiroma: “Nakai afama,” ixō yoifiaino Nios aō noikōi. Nāskakē noko onifani nā Ifofaafo tii keyokōi nō yopakōi. ²⁵ Niospa noko onifani nā Ifofaafo tii keyokōi nō kexenōnāsharatiro isharaxikī nānori fisti shināxikī. ²⁶ Akka nō fanīra moxaki chachixō nō pae meetiro keyokōi nōko yora pāei fetsetiro. Nāskarifikī Jesús Ifofaa fetsa omiskōiaito keyokōi nōri shināmitsatiro. Nāskafakī yorafāfe Jesús Ifofaa fetsa sharafakē keyokōi nō afe inimakōitiro.

²⁷ Akka nō Cristo yora keskarakōi. Nāskax nō āfe pōya keskarafo. Nō ichapafiax nō yora fisti keskarakōi. ²⁸ Nāskaxō keyokōi nā nō Jesús Ifofaa tii Epa Niospa noko katoni aōxō afara fetsa nō anō. Akka fetsafori taefakī ato katoni Jesucristoōnoa ato yoifofāsafanōfo. Askatari fetsafori katoni āfe meka yoimis inōfo Niospa ato shināmanaino. Askatari ato katoni ato tāpimamisfo inōfo. Askatari aōxō tsōa atiroma keskara amisfo ato katoni. Askatari Niospa Yōshi Sharaōxō a isinī ikaifo ato sharafamisfo ato katoni. Askatari fetsafo ato axomisfo ato katoni. Askatari fetsafo shara yonomamisfo ato katoni. Askatari fetsafāfe āfe Yōshi Sharaōxō meka fetsapa yoiyomisma ato katoni ato yoinō āfe mekapa. Noko keyokōi katoni aōxō yorafo nō axosharanō. ²⁹ Niospa keyokōi noko katoni a apaiyai keskara nō anō. Akka noko askafafianino keyokōichi Jesucristoōnoa nō ato

yoifofāsafamisma. Askaxori keyokōi noko katonima āfe meka yoimisfo nō inō. Askaxori keyokōi noko katonima aōxō ato tāpimamisfo nō inō. Askaxori keyokōi noko katonima tsōa atiroma keskara aōxō afama mīshti nō fanō. ³⁰ Keyokōi noko katonima Jesúsxō isinī ikaifo ato sharafamisfo nō inō. Keyokōi noko katonima nā meka fetsapato āfe Yōshi Sharaōxō nō ato yoinō. Keyokōi noko katonima nā meka fetsa nikaxō nā yoia keskara nō ato tāpimanō. ³¹ Nāskakē Niospa mato imapaiyai keskara ixō nā Jesús Ifofaafō mā ato shara faxotafai. Niospa Yōshi Sharapa mato amapaiyai keskara nāfo fichipaikāfe. Akka nāfo sharafiano ē mato afara fetsa sharafinakōia iskaratīa ē mato yoinō. Ea nikasharakapo. Shara finakōia Niospa noko imapaiyai keskara ē mato tāpimanō, a noko Niospa noiai keskari fakī nōri fetsafo noisharakōinō.

13

Nō fetsafo nōisharakōitiro

¹ Ēfe mekapa ē yoifitiroxakī, yora fetsafāfe mekapari ē yoifitiroxakī, Niospa āfe ājirifāfe mekapari ē yoifitiroxakī ē Niosxō yorafo noiyamax ēkai afaa itiroma. Nāskax ē mekai achakōi itiro, fetsafo fekaxtefai keskara ē itiro. Nāskafakī ēa ē fetsafo axomis keskara ē itiroma. ² Niospa meka ē ato yoifikī ē ato noiyamax ēkai afaa itiroma. Askatari fetsafāfe Niospa meka tāpiyamaino akka ē tāpikōifixō ē ato noiyamax ēkai afaa itiroma. Askatari ē Nios chanīmara fakī finakōixō ē Niosxō ē nā machi xekafitiroxaki ē yorafo noiyamax ēkai afaa itiroma. Ē ato noiyamaino Niospa ea shara

ōima. ³ Nāskatari ě afama mīshti nā afaamaisfo keyokōi ě ato ināfixō ě ato noiyamax ěkai afaa itiro. Askatari Niospa meka shara ě ato yoiaito ea nikakaspakakī ea koaifono ě atoōnoax nafiakī ě ato noiyamax ěkai afaa itiro. Ĕ ato noiyamaino Niospa ea shara ōima.

⁴ Nō yorafo noikōiaino noko fekaxtefaifono nō atoki ōitifishkitiro, nō tenetiro. Nāskaxori nō ato noikōikī nō ato axosharatiro. Askaxori nō ato noikī nō xītipaitiro. Askatari kakapaimis nō itiro. Nō yorafo noikōikī nō iskitiro: “Ĕ tāpikōiaki. Ĕ fetsafo keskarama,” ixō nō yoitiro.

⁵ Nāskaxori nō ato noikōikī nō ato rāfinīfaima. Askaxori nōa apaiyai keskara fistis nō shinātiroma. Akka nō fetsafori nō ato axosharatiro. Askaxori nō ato fena feratemisma nō itiro. Nāskaxori noko fētsa chakafakī mekafino nō shinātaifatiroma. Afo shinātamaro nō aō noisharatiro. ⁶ Askaxori nō ato noixō fetsafāfe afara chakafaito ōi nō inimatiroma. Akka afara chanīmakoī shara nikai nō inimakōitiro. ⁷ Askaxori afara afe keskararafiaino nō Nios noikī nō shināchakatiroma. Nō tenetiro. Askatari ato noikōikī atoōnoa afara chaka yoiaifono nikakī nō chanīmara fatiro. Akka fetsafoōnoa chaka nikafixō nō tāpixoma, “Afaa chakafayamapainōfora,” ixō nō shinātiro ato noikī. Askatari a mēxotaima chakafaifoōnoa atoōnoa nō yoitiro iskafakī: “Nāfāfe mēxotaima afara chakafaifono Niospa ato chaka soaxotiro,” ixō nō yoitiro. Askatamaroko nō iskafatiro: “Nios Ifofakakī āto chaka xatetiromo,” ixō nō shinātiro ato noikī. Nāskaxori afara afe keskararafiaino nō Nios noikī nō kachikiri fatiro.

⁸ Nā Jesús Ifofaafāfe Epa Nios yafi yorafo ato

noipakenakafo. Askafiaino nõko mai keyoaino Niospa meka yoimisfãfe anã ato yoixikanima. Askaxori a yõra mekapama meka fetsapa yoim-isfãfe anã meka fetsapa yoixikanima. Askaxori nã tãpimamisfãferi anã noko tãpimaxikanima. Mã nõko Ifo nokoaino nõ anã ato yopaxiima noko axonõfo. ⁹ Nãskakẽ iskaratĩa Niospa noko tãpimanai keskara nõ tãpisharayoama. A Niospa meka noko yoimisfãfe keyokõi tãpisharafoma. ¹⁰ Mã Jesucristo nokoaino nõ a keskara shara ixii. Aatofi keyokõi tãpiakĩ. A tãpia keskara nokori tãpimaxii.

¹¹ Akka ã yomeax ãfe meka fãke meka keskara ã iyopaoni. Fakefãfe metiro keskarari ã meyopaoni. Fakefãfe shinãtiro keskarari ã shinãyopaoni. Iskaratĩa mẽ yosixõ fakefãfe shinãi keskara ã anã shinãima. Fakefãfe ichapa tãpiama. Akka ã iskaratĩa mẽ yosiax fakefo keskara anã ã ikima. Iskaratĩa ã feronãfakekõi ã anã fakefo keskarama. ¹² Feisiti fetakõikẽ nõko femãnã nõ õisharatiroma. Nãskarari Jesús nõ õitiroma afe keskara ikamãkĩ. Akka nã oaitĩa nõ õixii afe keskaramãkĩ. Akka iskaratĩa nõ tãpisharayoama. Akka Jesús oaino nõ tãpisharakõixii. Jesús noko tãpikõia keskarari nõri tãpikõixii. ¹³ Iskaratĩa nõ Nios chanĩmara fai. Nõ Nios chanĩmara faxõ nõ manai nã oaitĩa afe ipaxakĩ. Nõ Nios chanĩmara fai nã shara. Askatari afe ipaxakĩ nõ manaino nãri shara. Askatari nõ fetsafo noikõia nãfi sharafinakõiaki.

14

Niospa Yõshi Sharapa noko amapaiyai keskara anã Pablo yoini

1 Nã Niospa noko noiai keskafakĩ fetsafori noitaifakãfe. Nãskara sharakõi. Nãskara fichipaikãfe askaxikakĩ. Askatari Niospa Yõshi Sharapa afara fetsa mato amapaiyai keskara nõ fetsafo fe axoshara faatanãnõ, afori fichipaikãfe. Niospa Yõshi Sharaõxõ nã Niospa meka mã ato yoinõ fichipaikõikãfe. ² Askatari fẽtsa Niospa Yõshi Sharaõxõ meka fetsapato yoikĩ yorafo yoitama Niosroko yoitiro. Niospa Yõshi Sharaõxõ yoifiaitokai tsõa tãpitiroma. ³ Askatari fẽtsari Niospa meka shara noko yoikĩ noko tãpimasharatiro nõ Jesús Ifofasharanõ. Askata nõko õiti noko fepeaxosharatiro nõko õiti mẽra nõ inimanõ afara afeskarafiaino. ⁴ Askatari fẽtsa Niospa Yõshi Sharaõxõ meka fetsapato yoikĩ ãa metiro ãfe õiti fepeaka keskara. Askatari fẽtsa nõko mekapa Niospa meka shara noko yoisharaito nõ keyokõichi nikatiro. Nãskakẽ Niospa noko yoiai keskara nikasharax nõko õiti fepeaka keskara shara nõ itiro.

⁵ Mã keyokõichi nã meka fetsapato Niospa Yõshi Sharaõxõ mã yoipainõ. Nãskara sharafiano akka fẽtsa mãto mekapa mato tãpimasharai nãfi sharafinakõiaki. Akka fẽtsari meka fetsapato mato yoiaito mã nikatiroma tsõa mato yoiyamaino. Akka nã mato yoiai keskara fẽtsari mato tãpimatiro mã tãpinõ. Nikai mãto õiti fepeaka keskara shara itiro. ⁶ Efe yora mĩshtichi, meka fetsapato ã mato yoiaito mã nikayamax nã mekakai mãtonã afama. Nãskakẽ nã ã mato yoiai keskara Niosxõ mãto mekakõichi ã mato tãpimatiro Niospa mato yoipaiyai keskara mã tãpinõ.

⁷ Shinãkãpo, meka fetsa ã mato yoinõ. Xãiti

anorima maneaito nō nikasharatiroma fatomākī xafakīa maneaifo. ⁸ Askatari soraro fētsa nā kexemisto āfe pōōiti pōōatiro āfe sorarofo itipinīsharanōfo ato reteifoxikakī. Askafafiakī pōōasharamano tsōa tāpitiroma. Nāskakē tsoa itipinīsharatiroma ato reteifoxikakī. ⁹ Askatari meka fetsapa mā fetsafo yoiaino afeska faxōkai mā yoiiai keskara tsōa tāpitirofoma. Mā askara mekapa mekai māakōi mā mekai tsōa mato nikayamafiaino. ¹⁰ Akka nā maitio ikafo meka fetsapa mekakani. Akka nō ato nikatiroma. Āto kaifāfe meka fisti nikatirofo. Nāskax keyokōi meka shara. ¹¹ Akka ēfe mekapa ē ato yoiaito yora fetsafāfe tāpitirofoma. Ēkairoko āto kaifāfe mekapa yoiaito ea nikafo. Akka ē āto meka tāpiamax ē āto kaifo keskara itiroma. ¹² Nāskakē Niospa Yōshi Sharapa mato afara fetsa amapaiyai keskara nāfo mā fichipaikōitiro. Mato askafaino aōxō nā Jesús Ifofaafō mā ato ōiti fepeaxosharakōitiro Jesús Ifofasharanōfo. Nāskara fichipaikāfe Nios yonosharaxoxikakī.

¹³ Nāskakē Niospa Yōshi Sharaōxō meka fetsapato yoikī Epa Nios kīfikāfe nā mā yoiiai keskara mato tāpimanō. Mā tāpisharaxō atori mā ato tāpimatiro akairi nikakōisharanōfo. ¹⁴ Nāskakē Niospa Yōshi Sharaōxō meka fetsapato nō Nios kīfikī nōko shināmā shināxō nō kīfima. ¹⁵ Akka Niospa Yōshi Sharaōxō meka fetsapato ē Nios kīfitiro. Askatari yorafāfe mekakōichiri ē Nios kīfitiro keyokōichi nikanōfo. Askatari meka fetsapa fanāitiro. Askatari yorafāfe mekapari ē fanāitiro keyokōichi nikanōfo. ¹⁶ Mā Niospa Yōshi Sharaōxō meka fetsapa Epa Niosnoa mā yoifiaito afeskax-

okai a mato fe ichanãfãfe yoitirofoma iskafakakĩ: “Chanĩmakõi mã yoi,” mato fatirofoma tsõakairoko mãto meka tãpixõ. ¹⁷ Mã meka fetsapato Nios aicho fafiakĩ fetsafo mã ato õiti fepeaxosharatiroma mato nikafiaifono mãmãi meka fetsapato yoikĩ. ¹⁸ Efe yora mĩshtichi, Niospa Yõshi Sharaõxõ yõra mekapama meka fetsapa mato finõinĩfõfãta ã yoimiskĩ. Nãskakẽ ã Epa Nios aicho fai. ¹⁹ Askafia a Jesús Ifofaafoya fetsafori ã ãto yoipai ea nikanõfo. Ichanaĩti pexe anoxõ ato ichanãfaxõ ãto mekakõichi ã ato yoipai meka ichapama ã yoifiaito. Nãskarafi sharakĩ. Akka yõra mekapama meka fetsapa ã ato yoiaito ea nikatirofoma meka ichapa ã ato yoifiaito. Nãskakẽ mekakõichi ã ato yoipai ea nikanõfo.

²⁰ Efe yora mĩshtichi, ã mato tãpipapaiyai keskara tãpisharakãfe. Fake yomẽ tãpisharayoxoma, shinãsharatiroma. Nãskarifikĩ fake yomẽ shinãi keskara shinãyamakãfe. Mẽstekõi shinãkãfe. Akka yora xinifãfe chaka shinãtirofo. Akka fake yomẽfãfekai chaka shinãtirofo. Nãskakẽ fake yome keskara ikãfe. Afara chaka tãpipaiyamakãfe.

²¹ Isaías Niospa meka yoikĩ keneni iskafakĩ:

Nã israelifo ã ato yoifiaito ea nikakaspamisfo. Nãskakẽ ã ato kaxpakõi yoimis. Nãskaifãfe õikĩ ãto kaifoma ã atoki nĩchikẽ, ãto mekapa ato yoiaifãfe ato nikakanima meka fẽtsapamãi yoiafono. Ato yoifiaifonokai ato nikakanima, ixõ Isaías kirika keneni Niospa meka yoikĩ.

²² Nãskakẽ yõra mekapama nõ meka fetsapa ato yoiaito a Nios Ifofaafãfema noko nikatirofoma. Nãskakẽ Niospa ato õimani afãfekai Niospa meka tãpitirofoma Nios chanĩmara fayamakaxõ. Akka

Nios Ifoafaife Niospa meka tãpitirofo. Askata ichanãxõ ãto mekakõichi nõ ato Niospa meka yoiaino Niospa Yõshi Sharaõxõ nikasharatirofo. Akka nã chanĩmara faafãfema nikasharakanima ãto mekakõichi nõ ato yoifiaino. ²³ Nãskakẽ ichanãx yõra mekapama meka fetsapa mã mekaino a Nios chanĩmara faafoma fe a mato fe yoramafori mato fe ichanãxõ mato nikakakĩ shinãtirofo iskafakakĩ: “Õikapo, nã yorafo nã afaa shinãifoma keskarafõ,” ikanax yoinãtirofo. ²⁴⁻²⁵ Nãskata mã ichanãxõ Niospa meka mã yoisharaito a Nios chanĩmara faafoma fe a nofe yoramafori mato nikakaxõ ãto õiti mẽraxõ shinãtirofo iskakakĩ: “Ooa, nõri Niospa yoiai keskara nõ amisma. Niospa keyokõi tãpikõia. Nõko shinã mẽraxõ nõ afara pishta fomãpaimisfo Niospa tãpikõia. Chipõ noko kãimaxoxii,” ixõ shinãtirofo. Nãskaxõ shinãtirofo Niospa meka mẽstesharakõikĩ. Anori shinãkakĩ ratokonõ mai chachixõ Epa Nios kĩfitirofo iskafakakĩ: “Epa Niospa, mã sharafinakõia. Na mia chanĩmara faafõ fe mã ika keskai nõri mefe ipai,” ixõ kĩfitirofo.

Pablo ato yoini nõ ichanãx nõ afeskatiromãki

²⁶ Efe yora mĩshtichi, ã mato yoipai iskafakĩ ã mato tãpimapai. Mã ichanãino fẽtsa mato fanãixotiro. Fẽtsari mato Niospa meka yoitiro. Fẽtsari Niospa Yõshi Sharaõxõ meka fetsapa mato yoitiro. Fẽtsari Niospa Yõshi Sharaõxõ a meka fetsapato mato yoiaifo mato tãpimatirofo. Nãskakẽ nã ã yoiai keskara asharakãfe. Nãskax mã ranã mã õiti fepeasharatiro. ²⁷ Mã ichanãino yora

ichapama a yōra mekapama meka fetsapa mekapai mekatirofo. Nāskakē fetsa mekai taetiro. Askatari fetsari chipo mekatiro. Akka meka fetsapato mato yoiaito fētsari māto mekapa xafakīa mato tāpimatiro a mato yoiai keskara mā nikasharanō. ²⁸ Akka yōra mekapama meka fetsapato mā yoipaiyaito tsōa nikatiroma. Akka a ato tāpimatirofo ano ikafomano meka fetsapa mā ato yoitiro. Akka māto pexe anoax mares fisti mā mekatiro yōra mekapama Epa Nios fe.

²⁹ Mā ichanāino nā Niospa meka yoimis rafeta Niospa meka mato yoitirofo. A yoiai keskara nikakaxō nā Jesús Ifofaifāfe shinātiro iskafakakī: “Niospa Yōshi Sharaōxō noko yoi,” askayamai, “Āa shināxō noko yoirā,” ixō shinātirofo. ³⁰ Askaxō fētsa Niospa meka mato yoiyoaino fetsari tsaoano Niospa Yōshi Sharapa shināmanaino mato yoipaikī yoitiro. Akka a taefakī yoiato tsoxō nikatiro. ³¹ Nāskakē Niospa Yōshi Sharapa mato shināmanai keskara fētsa yoikī taefatiro fētsari chipo yoitiro. Askatari fētsari yoitiro. Nāskaifono nā ichanāfāfe keyokōichi ato nikatirofo. Nāskaxō ato ōiti fepeaxosharakani. ³² Nā Niospa meka ato yoiaito āfe shinā mēraxō shinātiro iskafakī: “Fētsari ato yoipai kiki ikax xatetiro.” ³³ Askaxō ichanāxō rafekaita ato yoiaifono tsōa ato nikasharatiroma. Nāskakē āto ōiti fekaxtefatirofo. Askarakai Niospa fichipaima. Akka Niospa fichipai nā ichanāfo anoxō rafekaita ato yoiyamaino fistichi ato yoinō nikasharakōinōfo.

³⁴ Askatari afara fetsari ē mato yoisharapai. Nios Ifofaafo ichanāifo anoax xotofakefo mekatirofoma. Niospa meka yoimisto yoiaino

xotofakefãfe nikakõitirofo. Mekatamaroko nã Niospa meka yoiyai keskara nikasharaxikakĩ. Nãnori taeyoi Niospa meka yoikakĩ kirikaki kenenifo. ³⁵ Nã ichanãkaxõ nikafo keskara xotofakefãfe tãpisharaxoma ãto fene yõkapaikakĩ manayotirofo. Akka ãto pexe ano nokokaxõ ãto fenefo yõkatirofo ãto fenefãfe ato tãpimanõ. Nãskakẽ mã ichanãino xotofakefo mekaifokai sharama.

³⁶ Akka Epa Niospa yoipaiyai keskara mato fisti taefakĩ tãpimanima. Niospa meka yoimisfo matoki fisti fenifoma Niospa meka yoifekani. Fetsafori yoifekani fenifo. ³⁷ Akka fatora fẽtsa mã yoikĩ iskafatiro: “Nõ Niospa meka ato yoimis. Askatari nõ Niospa Yõshi Sharaõxõ nã Nios Ifofaafõ nõ afara fetsa ato axosharatiro,” ixõ mã yoikĩ mã tãpitiro nã ã mato kenexonai keskara nõko Ifãfe mato yoiã mã anõ. ³⁸ Fẽtsa anorima mato yoiãito nikayamakãfe. ³⁹ Nãskakẽ efe yora mĩshtichi, nã mã ichanãino anoxõ Niospa meka ato yoipaikãfe. Nã sharakõikĩ. Akka fẽtsa yõra mekapama meka fetsapa Niospa Yõshi Sharaõxõ mato yoipaiyãito xatemayamakãfe. ⁴⁰ Akka mã ichanãino fẽtsa taefakĩ yoitiro. Askatari fẽtsari chipo yoitiro nã yoiãifo keskara mã nikasharakõinõ. Mã askaino mãto õiti fekaxteima.

15

Cristo nafiax anã otoni

¹⁻² Efe yora mĩshtichi, iskaratĩã meka shara Jesúsnoa ã mato yoimis keskara ã anã mato shinãmapai. ã mato Jesúsnoa yoiãino mã chanĩmara fani. Mã chanĩmara faito Jesús mato chaka soaxoni mã afe ãpaxanõ. Akka ã mato yoini keskara mãkai

kachikiri famisma. Akka mã kachikiri faino ãa kaxpa mato yoikerani.

³⁻⁷ Yorafãfe ea meka sharafinakõia yoiyonifo. Nãskakẽ ãri mato yoini iskafakĩ: Cristo noko nãxoni nõko chaka noko soaxoxiki. Akka Cristo tres nia maiyoni. Askata anã otoni. Mã otoax Pedroki nokoi taeni. Nãskatari chipo a aõxõ tãpimisfokiri nokoni. Askatari nã chanĩmara faafoki yorafã rasifokiri nokoni. Akka fisti rasi nãpaifono, akka ranãri nanifoma. Nãskatari chipo Santiagoki nõko Ifo nokoni. Askatari a aõnoa ãfe meka yoimifoki nokoni.

⁸ Akka chipokõi ekeki Jesús nokoni. Ëkai aõnoa afaa tãpiyopaonima. Akka fetsafãfe mẽxotaima nikayopaonifo. Nãskakẽ chanĩmara fakĩ taefanifo. Akka ã afe niyopaonima taeyoi a fetsafo ikai keskai. Ë askafiaino ea Jesús katonni chipo. Ekeki nokoxõ ea yoiaino ã koshi Ifofani. ⁹ Akka ã chakafayopaoni keskara Jesús Ifofaa fetsafãfe chakafamisfoma. Akka ã afara chakafakĩ finayopaoni. A Jesús Ifofaafo ã ato omiskõimayopaoni. A afe yorafo ã chakafayopaonifikẽ Jesús ea noikĩ ea nĩchini aõnoa ã ato yoinõ. ¹⁰ Niospa ea noixõ ea katonni a apaiyai keskara ã anõ. Nãskakẽ nã ea amapaiyai keskara mẽ amis. Akka ea kaxpakõi katonima. Nã aõxõ yonoxomisfo keskafakĩ ã yonoxokĩ finakõimis. Akka ãakõi ã yonoxomisma. Ea noikĩ Niospa ea katonni ã Jesús yonoxomis inõ. ¹¹ Akka ã Jesúsnoa yoimis iyamai fetsafãfe mato Jesúsnoa yoimis itirofo nãnori fisti nõ mato yoimis. Nãskakẽ nã Jesúsnoa fisti nõ mato yoimis keskara nikakĩ mã mã Jesús chanĩmara faa.

Namisfo otoxikani

¹² Nō mato yoimis iskafakī: “Cristo noko naxōfinixakī mā anā otoni,” ixō nō mato yoimis. Akka, ¿afeskakī atirito mā yoikī iskafamismē? “Yora naax anā ototiroma,” ixō mā anorima yoimis. ¹³ Akka yora naax ototirokēma Cristori otokeranima. Akka nō tāpia yora naax ototirokē nāskakē Cristo otoni. ¹⁴ Akka Cristo otoyamanikē kaxpa aōnoa nō mato yoikerana. Nāskakē kaxpakōi mā chanīmara fakerana. Akka chanīma Cristo naax otoni. ¹⁵ Akka Cristo otoyamanikē nō mato pārakerana. Akka nō mato yoimis iskafakī: “Epa Niospa Fake Jesús otofani,” ixō nō mato yoimis. Yora naax ototirokēma Epa Niospa Cristo otofokeranima. ¹⁶ A naafo otoyamaino Cristori otokeranima. ¹⁷ Cristo otoyamanikē kaxpakōi mā chanīmara fakerana. Māto chaka mato soaxokeranama. ¹⁸ Akka Cristo otoyamanikēkai nōri naax nō otokeranama. Askax nō afe nīpakeranama. ¹⁹ Nono mai anoxō niyoxō nō shinākī iskafakerana: “Ē naax Cristo otoni keskai ēri otoxii ea Niospa otofaano,” ixō nō shināfiax Cristo otoyamanikē nāskakē kaxpa nō chanīmara fakerana. Akka Cristo otoyamanikē chanīmayamakē, “Afaa tāpiafoma,” noko fakeranafo nokoōnoa shināchakakōikeranafo.

²⁰ Akka chanīmakōi, Cristo otoi taeni. Anā naxiima. Nāskakē Cristo otonino nā chanīmara faafo nakanax otoxikani afe ipaxakakī. ²¹⁻²² Akka Adán Niospa onifakī taefani. Adán taefakī afara chakafani. Nāskakē afara chakafaax nani. Akka nā feronāfakeōnoax keyokōi nāpamisfo. Nāskarifiai nā feronāfake Cristoōnoax nā chanīmara faafo ototirofo afe nīpaxikakī. ²³ Cristo otoi taeni

nĩpaxakĩ. Nã anã oaitĩa keyokõi afe yorafo ototaxii afe nĩpaxanõfo. ²⁴ Nãskatari nono mai anoafokaxikani. Nãskatari Cristo keyokõi xanĩfofo potaxii anã xanĩfo inõfoma. Askatari niakafãfe ãto xanĩfofori potaxii. A niakafãfe ãto xanĩfo finakõiaripotaxii. Cristo ato potano anã ato yonomapakenakafoma. Nãskaxõ Cristo Apa Nios yoikĩ iskafaxii: “Mã yorafo keyokõi ãto xanĩfo mĩ itiro. Ë anã ãto xanĩfo ikima,” ixõ Apa yoixii. ²⁵ Akka iskaratĩa Cristo nõko xanĩfo iyoa. Nã xanĩfo fetsafo a Cristo nikakaspaifo Niospa anã ato afaa imaxiima. Cristo nãmãri ato nĩchixii. Nãskatari Epa Nios xanĩfokõi ipanaka. ²⁶ Akka Niospa Satanás omiskõipakenakafo mẽra potaxii. Akka nã Satanás Adán afara chakafamanino keyokõichi nõ afara chakafaax nõ napanaka. Nãskakẽ Niospa Satanás omiskõipakenakafo mẽra potano anã tsoa nanakama. ²⁷ Nãskaxõ Niospa ãfe Fake Cristo nãmãri keyokõi ato nima. Akka mã nõ tãpia Apa Nios fisti ãfe Fake nãmã ikama nãatomã nãmã keyokõi ato nimax. ²⁸ Keyokõi Niospa Fake nãmã ikafono Apaõxõ ato yonomatiro. Nãskaxõ ãfe Fãke Apa yoixii iskafakĩ: “Epa mĩri ea yonomatiro,” ixõ yoixii. Nã Apa yoiari keskara nikasharakõi. Nãskakẽ Apa Nios fistichi keyokõi yonomaxii ãto xanĩfo finakõimãiaxõ.

²⁹ Akka yora maotisamisma naano fẽtsa maotisaxotiro. Nãskara mã feyafamisfo. Akka yora naax otoyamanikẽkai tsõa ato maotisanoxokeranama. Tsoa otoyamanikẽ nõri ototiro. Akka, ¿afeskai nõ maotisaxonimẽ nõ otoyamafi? Akka nõ tãpia mã nõ naax nõ anã ototaxii. ³⁰ Akka tsoa otoyamanikẽkai

ēri otokeranama. Nāskakē, ĵafeskai mēxotaima Cristoõnoax mesekõi mēra ě kafāsaimē ě otoyamafi? Akka ě tãpia a ě otoxiai. Nāskakē mēxotaima ě Cristoõnoax mesekõi mēra kafāsai Cristoõnoa ato yoifofāsafai. ³¹ Nāskakēri ě fetsafo matoõnoa yoisharamis māmāi eõxõ nõko Ifo Jesucristo mã Ifosharafaino. Efe yora mīshtichi, chanīma ě mato yoi mēxotaima Cristoõxõ ea retepaikani. ³² Poomānā noko pipaiyai keskara nã Efeso anoafãfe ea retepainifo, a Cristo nikakaspaifãfe. Akka Cristoõnoax ě naax ě otoyamax kaxpa ě aõnoax nakerana. Askatari ě ato Cristo Ifofamano nakanax tsoa otoyamaino kaxpa ě ato Cristo Ifofamakerana. Nõ naax anã otoyamafixixakĩ nã nõ apaiyai keskara nõ anõkãfe. Nāskakē fetsafãfe yoikakĩ iskafakani: “Nõ nayoxoma nõ piyanã nõ ayayoi inimayanã. Nõ Nios shinātama nã nõ apaiyai keskara nõ ayoi,” ixõ shinākani anorima. Akka nõ naax nõ anã otoxii. Nāskakĩ nõ nayoxoma Niospa noko amapaiyai keskara nõ anõkãfe.

³³ Niosnoa yora chakafãfe mato pāramisfo. ato fe rafeyamakãfe. Yora chakafo fe mã rafeaito matori afara chakafamatirofoki. ³⁴ A mã anorima shināmis anã shināyamakãfe. Chakafakĩ xatekãfe. Atiritokai mã Nios tãpisharama. Nāskax mã rãfipaitiro.

*Nõ naax anã nõ otoaitĩa nõko yora fetsa keskara
ixii*

³⁵ Akka yoikĩ iskafakani: “ĵAfeskaxõ Niospa naafo ofofaxiimē? ĵAnã nõ otonõ afe keskara yoraya noko imaimē?” ixõ yoikani. Anori yoikakĩ afaa shinākanima. Akka shara shināsharakakĩ

tāpitirofo. ³⁶ Nō ifi exe fanano āfe xaka payokometiro. Akka āfe exe oke mēranoa pishta payokometiroma chipo foaitiro. Maiax āfe exe xaka naamax āfe exe pishta foaitiroma. ³⁷ Akka nō afara fanakī nō āfe kayafoya fanatiroma. Āfe exe fisti nō fanatiro. Mā āfe xaka payokomeaino āfe exe foaitiro. Nāskax mā foaikax anā āfe exe keskara itiro. Fetsa keskara itiro. ³⁸ Nā ifi exe nō fanano Niospa foaimasharatiro. Nā apaiyai keskafakī fanafo fetsa fetsatapafo fai.

³⁹ Akka nōko yorari yoināto yora keskarama. Nōko yora fetsa keskara. Yoinānā fetsa keskarafono peyafonāri fetsa keskarafo. Foenāri fetsa keskarafo. Akka nā yora fisti keskara Niospa noko onifanima, fetsa fetsatapafo Niospa noko onifani. ⁴⁰ Akka nōko mai anoafāfe āto yorafo fetsa keskarafo. Askatari Epa Nios ari anoafori nai mēranoafāfe āto yorafori fetsa keskarafo. Keyokōi sharafīax askarafoma. ⁴¹ Akka xini ikaino oxe ikaino fishifo ikaino nā yora fisti keskarama fetsa keskarafo. Nāfo sharafīax askarafoma.

⁴² Nāskarīfiai yora naino āfe yora payokometiro. Anā nō otoaxkai nōko yora payokomenakama. Nāskara shara nō ipanaka anākai nō nanakama. ⁴³ Nōko yora maia anoax chakakōi ixii. Akka nō otoax sharakōi nō ipanaka. Nō nono mai ano niyoax nō iramanapakeax nō natiro. Nō anā otoaxkai nō anā nanakama, mitsisipa shara nō ipanaka. ⁴⁴ Nō naano noko maifafono nōko yora payokomei. Akka nō otoano Niospa noko nimaxii afe ĩpaxanōfo. Akka nō mai ano niyoax nō natiro. Akka mā nō naax anā nō otoax nōko yora fetsa keskara ixii. Nō anā nanakama. ⁴⁵ Niospa meka

yōra kenekī iskafani: “Feronāfake Adán Niospa onifakī taefani. Onifaxō xāka ikai fani,” ixō yōra kirikaki keneni. Akka Cristori Adán keskara feronāfake. Feronāfakekōixō noko nimapakenaka. Nō naax anā otoax nō anā natiroma. ⁴⁶ Niospa feronāfake Adán onifakī taefani. Chipō Cristori kāini noko nimapakexakī. ⁴⁷ Niospa nā feronāfake Adán onifakī taefani. Mai yorafaxō onifani. Akka Cristo nai mēranoax nokoki ftoni. Tsōakai Cristo onifanīma. ⁴⁸ Akka nono mai anoax nō kāiax nōko yora Adán yora keskara. Nō Jesús Ifofaax nā keskara nō ixii. ⁴⁹ Nō nono mai anoax fake kāini. Nāskax nō Adán keskarakōi. Askatari nō Niospa yora ikax nō Jesucristo keskarakōi ixii.

⁵⁰ Efe yora mīshtichi, ē mato yoinō nō afeskax iximākai. Nō iskaratīa namiya. Askatari nō imiya. Nāskara yorayax Nios fe nō ipanakama. Akka nōko yora natiro nō anā otoxixakī. Nō anā otoax nōko yora fetsa keskara ixii. Nāskakē nō anā nanakama. ⁵¹ Tsōakai nikayomisma na meka shara ē mato yoi. Tāpipaikī ea nikasharakāfe. Akka nōkai atiri naima. Askafīax nō keyokōi fetsa keskara iki fetsexii. ⁵² Jesús anā oaino āfe ājirinī āfe maneti maneaino Jesús chanīmara faafo, a nayoamafo, fetsa keskara itaxikani. Fetsoitanai keskarataxikani fetsa keskara itaxikani. Askatari Jesús chanīmara faax namisfori otorisataxikani. Nāskakē keyokōi Jesús chanīmara faafo tii fetsa keskara ixikani. Askax anā nanakafoma. ⁵³ Nō iskaratīa naino nōko yora payokometiro. Askafiano Niospa nōko yora noko fetsafaxoxii nō anā nanōma, nō afe nīpaxanō. ⁵⁴ Nānori Niospa meka yoikakī kirika kenenifo. Nā yoinifo keskara

chanĩmakõi ixii. Iskafakakĩ kirika kenenifo yoikakĩ: “Aicho. Anãkai Niospa yorafo nanakama. Cristoõnoax nõ afe isharapakenakaki,” ixõ kirika kenenifo. ⁵⁵ Askatari kenenifo iskafakĩ: “Anãkai afanã noko namatiroma. Anãkai nõ nai omiskõinakama,” ixõ kirika kenenifo. ⁵⁶ Nõ afara chakafamisnoax nõ nai nõ omiskõitiro. Nãskakẽ nã Moisés noko yoinioxõ nõ tãpitiro afara chakafaax nõ natiro. Naax nõ omiskõixii. ⁵⁷ Akka Jesucristo noko nãxoni noko chaka soaxoxiki. Nãskakẽ nõ Jesucristo Ifofaax nõ nafiax nõ anã otoax nõ anã nanakama. Nõ afe nĩpanaka. Nãskakẽ nõ Epa Nios aicho fai.

⁵⁸ Akka efe yora mĩshtichi, afara fetsa shinãyamakãfe. Niospa noko imapaiyai keskara nã fisti shinãsharakãfe. Jesús Ifofasharakãfe. Nõko Ifo Jesús yonoxosharafafãikãfe. Mã mã tãpia nõko Ifoõxõ nõ yonoai kaxpa nõ yonomisma, nõko Ifomãi noko amakẽ. Nãskakẽ nõ aõxõ ato axosharatiro nõ kaxpa ato axõima.

16

Nã Nios Ifofaafãfe kori ichafaxõ Nios Ifofaafõ fetsafo fomani

¹ Iskaratĩa mã ea yõkaita, afara fetsa kirikaki kenexõ ã mato yoi. Nios Ifofaafõ Jerusalén anoafõ afaamais. Ato noikĩ mã ato afara fomatiro. Akka nã Nios Ifofaafõ Galacia anoafõ ã ato yoia keskara ã matori yoipai nã afaamaisfo afarafo mã ato inãsharanõ. ² Nomĩkotĩa ichanãi mã kori ichafaxõ chipo Jerusalén anoa mã ato fomatiro. Yonoxõ kori fĩta atiri mã ato inãtiro. Akka mã kori ichapama fixõ ichapamari mã ato inãtiro. Akka mã ichapa fixõ ichapari ato inãkãfe. Nomĩkotĩa

ichanāi mā kori ichafatiro, ea manakima kori ichafayokāfe. Nā ē matoki nokoaitīa mā anā kori meketiroma. Nā kori mā ichafaa nā Jerusalén anoafō afaamaisfo mā ato fomatiro mē Corinto ano matoki oano. ³ Nāskano feronāfake sharakōifo katokāfe afāfe nā afaamaisfo ato kori foxotanōfo Jerusalén anoafō. Nāskatari ē Corinto ano nokoxō Jerusalén anoafō ē kirika kenexō ē ato fomanō. Nā feronāfake sharakōifāfe ato foxotanōfo. Akka nā feronāfakefāfe nofeta Jesús Ifofaafō. Nāskakē ato ifisharakāfe ixō ē kirika kenei nā feronāfakefo sharakōifāfe foxonōfo Jerusalén anoxō Jesús Ifofaafāfe ato tāpinōfo. ⁴ Niospa ea nīchipaiyaino nā feronāfakefo mā katoa efe fotirofo.

Pablo Corinto ano kapaikī ato yoini

⁵ Ē Macedonia finōfainikai ē matoki Corinto ano nokoikai. ⁶ Ētsa, ē ano mato fe samaraka pish-tayotiro rakikīa. Askayamai ē mato feta mechaka fisti finōyotiro rakikīa. Nāskakē ē matoki nokoaino mā ea axosharayotiro. Askatari mē kaino mā ea nīchitiro ē kasharatanō. ⁷ Ēkai mato finōfaipaima. Niospa ea nētefayopaiyaino ē mato ano nēteyotiro.

⁸ Askafiax ē nono Efeso ano iyoi nā nōko fista āfe ane Pentecostés ikaitīa. ⁹ Nonoxō yorafāfe nōko Ifoōnoa nikapaikani. Nāskakē ē nonoxō nōko Ifoōnoa ē ato yoisharayoi chanīmara fanōfo. Ē nōko Ifoōnoa ato yoifiaito atirifāfe ea xatemapaikani ē Jesúsnoa yoiyamanō.

¹⁰ Akka ē nōko Ifo yonoxomis keskafakī Timoteori nōko Ifo yonoxomis. Nāskakē matoki Timoteo nokoaino kexesharakāfe akiki inimayanā. ¹¹ Nāskakē, “Mī afaamara,” fayamakāfe. Nāskax mato anoax ekeki oaino nīchisharakāfe inimayanā

ekeki nokonō. Nios Ifofaa fetsafo fe ekeki nokoyonō ã anã ato fe rafesharanō.

¹² Askatari iskaratã nofe yora Apolosōnoa ã mato yoi. Ë Apolos yoia iskafakĩ: “Corinto anoafo õiyotãfe,” ã feito ea yoia iskafakĩ: “Ë iskaratã kayotiroma. Niospa ea nĩchipaiyaitã ã katiro,” ixõ ea yoia.

Pablo mã mekai xatekĩ Corinto anoafo ato meka fomani

¹³ Jesús shinãfafãikãfe chakafakakĩma. Jesús Ifofasharakãfe. Jesús chanĩmara faax afara afeskarafiato rateyamakãfe. Kachikirifayamakãfe. ¹⁴ Afarafo mã akai keskara Nios yafi yorafo noikĩ axosharakãfe.

¹⁵⁻¹⁶ Estéfanas afe yorafo fe Acaya ano ixõ nãnoxõ Jesús chanĩmara fakĩ taefanifo. Mã mã ato õimiskĩ. Mã mã tâpia nãfãfe Nios Ifofafo sharafamisfo. Nã keskarafo nikasharakãfe. Nã ato feta yonoaifori nikasharakãfe.

¹⁷ Ë inimasharakõi Estéfanas, Fortunato, Acaicori afo ekeki nokoafono. Akka mã ea axopaiyai keskara nãfãfe mã ea axõafo. Mã ea axotiroma mã chaikõi ika. ¹⁸ Nã tiito ea inimamamisfo. Mato inimamamisfo keskafakĩ eari inimamamisfo. Nãskakẽ atoõnoa yoisharakãfe.

¹⁹ Nã nõko Ifo chanĩmara famisfãfe Asia anoafãfe mato yoisharapaikani. Aquila feta ãfe ãfi Priscila mato yoisharapaikani. Mato shinãkõikani. ãto pexe mẽranoax ato fe ichanãmisfãferi mato yoisharapaikani. ²⁰ Keyokõi nõko Ifo chanĩmara faafãfe nono efe ikaxõ mato yoisharapaikani. Nãskakẽri mã ranã yoinõnãsharakãfe.

²¹ Ëfi Pabloki mẽ mekai xatekĩ meka rafes ã mato kenexonõ. Akka taefakĩ nofe yora Sóstenes ea kirika kenexona. Akka iskaratĩa ãkõi kirika mato kenexoni mã tãpinõ.

²² Fatatora nõko Ifo noiyamaino Niospa omiskõimapainõ omiskõipakenakafo mẽra potakĩ.

Nõko Ifo Jesús chaima nokopainõ.

²³ Nõko Ifo Jesucristo mato noikĩ mato inima-masharakõinõ.

²⁴ Ë nõko Ifo Jesucristoõxõ keyokõi ã mato noi. Nã tii.

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

6c7b7ce2-9d87-5405-91e6-71ce1387adcc